

# Odömänoidi

## inänite Pabodo nänö cadota ante yewæmongainta

---

Waa quëwencæminimpa, ante

**1** <sup>1</sup>Itota Codito ingante në cædömo inte botö Pabodobo inömo inte iï cadota ante në yewæmömo imopa. Wængongui botö imote apænte æninque iïmainö ante aa pegacäimpa. Bitö Pabodobi gote botö pönö cædö ante watapæ apænebi ëñencædänimpa, ante angacäimpa.

<sup>2</sup>Mäninö, Wængongui æbänö pönö cæqingä, ante watapæ apænedinque tömengä beyæ në apænegainäni wëñëñedë pönï nani tæiyæ waëmö yewæmongainö ante botö mäninö ante në apænebo imopa. <sup>3</sup>Mäninö waa pönï nänö cæquïnö ante iinque cæcæte ante cædinque Wængongui tömengä Wengä ingante da pönongä pongacäimpa. Tömengä iñömö waocä onguiñængä nänö baquinque Awënë Dabii wodi Pæingä inte ëñagacäimpa. <sup>4</sup>Adocä Itota iñömö botö Wengä inongä ingampa, ante tömänäni edonque acædänimpa, ante odömoncæte ante cædinque Wængongui tæi piñænongä inte iïmai cægacäimpa. Iingä Itota Codito mönö Awënë iñömö Tæiyæ Waëmö ewocacä inte do wæningä iñongante Mæmpo Wængongui wæætë nanguï angä ate nïni ömæmongacäimpa.

<sup>5</sup>Ayæ adocä tönö godongämæ cædinque tömengä ëmöwo beyæ mönitö imönite Wængongui pönö waadete cægacäimpa. Ayæ, Minitö wabæca wabæca gote apænemini ëñëninque tömämæ quëwënäni Itota Codito ëmöwo ante wede pönëninque në

ëñente cæte quëwënäni bacædänimpa, ante cædinque Wængongui adobaï Itota önompo inte mönitö imönite da godongä gotamönipa. <sup>6</sup>Iinque tömämæ quëwënäni inänite Itota Codito, Botö gämænö pöedäni, ante aa pedinque minitö imönite adobaï aa pecampa. <sup>7</sup>Minitö botö quimini badinque botö ayömö tæiyæ waëmö ewocate quëwëmini bacæminimpa, ante Wængongui cægacäimpa. Iinque minitö Odömä iñömö quëwëninque Wængongui quimini iñöminite botö, Acæminimpa, ante iïmai ante yewæmömopa. Mönö Mæmpo Wængongui tönö Awënë Itota Codito waadete pönö cæyönote minitö wæætë gänë pönente bacæminimpa, æninque yewæmömopa.

**Odömä iñömö ëñacæ pöinëmopa, ante**

<sup>8</sup>Minitö æbänö wede pönëmini, ante tömämæ quëwënäni tededäni ëñënanipa. Iinque botö iñömö Itota Codito ëmöwo apænedinque Wængongui ingante waa ate apænebopa. Wængongui bitö adobique pönö cæbi ate odömänoidi wede pönënanipa, ante apænebopa. <sup>9</sup>Wængongui Wengä ingantedö ante watapæ apænedinque botö Wængongui ingante në cædömo inte tömengä nänö änö ante ædæmö ewocadinque apænebo ëñënanipa. Botö mänömai cæbopa, ante në adingä inte Wængongui iñömö edæ, Odömänoidi beyæ ante Pabodo botö imote woyowotæ incæ itædë incæ apænecampa, ante në ëñengä ingampa. <sup>10</sup>Edæ, Wængongui, bitö Ao ämi ate botö nïwo odömänoidi weca

ēñacæ gobaiŋmopa, ante Wængongui ingante mīnitō beyæ ante botō cōwē apænebopa. <sup>11</sup>Wængongui Ōnōwoca beyæ apænebo ēñēninque mīnitō tæi piñænte ēwocacæmīnimpa, ante cæcæte ante botō mīnitō weca ēñacæboimpa, ante wæbopa. <sup>12</sup>Edæ mīnitō botō wede pōnēnō beyæ wampo pōnente bayōmīni botō wæætē, Mīnitō wede pōnēmīnīpa, ante adīnque adobaī wampo pōnēmo īnīnque mōnō pōnencabo godongāmæ wampo pōnēninque godōmenque tæi piñænte entawengæimpa, ante pōnēninque botō mīnitō imīnite aīnente wæbopa.

<sup>13</sup>Botō wabæca quēwēnāni weca gote apænebo ēñēninque pancadāniya wede pōnēnāni badānitapa. Īnīnque, Botō mīnitō weca gote apæneyōmo wadāni pancadāniya adobaī wede pōnencadānimpa, ante cædinque botō æpogamē incæ poncæ cæyōmo edæ wææ cæte intapa. Īnīnque botō, Tæmpo poncæ cætābopa, ante yewæmōmo ate ēñencæmīnimpa, ante yewæmōmopa. <sup>14</sup>Edæ guidiegoidi incæ wadāni incæ, ocai encadāni incæ ocai ōmæcadāni incæ ædānimē īñōnānite botō debe inte bai edæ tōmānāni īnānite odōmonte apænequēnēmo īnōmo īmopa. <sup>15</sup>Mānōmaī beyæ mīnitō Odōmā īñōmō quēwēmīni īñōmīnite botō mīnitō imīnite adobaī mōnō Codito ingantedō ante watapæ apænecæte ante nangui cæinente wæbopa.

**Mōnō tæi piñænte ēwocadō  
Codito beyænque impa, ante**

<sup>16</sup>Mōnitō oodeomōni īñōmōnīte tāno apænedīnque Wængongui īñōmō mīnitō oodeoidi ināmaī īñōmīnite ayæ adobaī apænedīnque, Mīnitō wede pōnēmīni adīnque Codito waa pōni pōnō ængā beyænque quēwencæmīnimpa, ante tæi piñænte cægacāimpa. Īnīnque mānīnō Codito ingantedō ante botō īñōmō watapæ apænedīnque, Wængongui tæi piñænte nānō cægāinō impa, ante pōnente wædinque edæ guīñēnedāmaī inte do apænebopa.

<sup>17</sup>Mōnō wede pōnēmo īñōmonte Wængongui mānīne ante odōmonte watapæ apænecā beyænque mōnō nō cæte quēwēmō bagamōimpa. Mānīne beyænque godōmenque wede pōnente badīnque mōnō wede pōnēnō beyænque quēwēmōmopa. Īnīnque docā īñōmō Wængongui beyæ yewæmōnīnque, “Nē nō cæte quēwēnongā incæ tōmengā nānō wede pōnēnō beyænque quēwencæcāimpa,” ante nānō yewæmongāinō bai edæ do batimpa.

**Mōnō waocabo wentamō  
mongænte wæmōmopa, ante**

<sup>18</sup>Nē wīwa cædāni guiquēnē wīwa nāni cædō beyænque wadāni edæ Wængongui nō pōni nānō apænegāinō ante ædō cæte ēñenguīnānī. Īnīnque Wængongui ingante nē wīwa cædāni nāni ēñēnāmaī īnīnō ante godō piīnīnque tōmengā ōnædē ongōnīnque wīwa nāni cædinō beyænque do pangā wædāni edonque amōmopa. <sup>19</sup>Wængongui, Botō æbodō īmoō, ante tōmāmīni edonque pōni ēñencæmīnimpa, ante cædinque tōmāmō īmonte odōmōnīnque tōmēnāni īnānite adobaī edonque pōni odōmongā wægadānimpa. <sup>20</sup>Wēēnēñedē pōni nē quēwengāināni tōnō nōwo ganca quēwēmō adobaī, Wængongui mōnō nē adāmaī īnongā inte æbānō quēwengāā, ante ēñencæte ante wægāimō īnōmō inte mōnō tōmengā nānō badongaincooque adīnque edæ edonque pōni acæimpa. Edæ, Tōmengā nīmpo cædāmaī inte cōwē nē tæi piñænongā ingampa, ante ayæ, Nē Wængongui īnongā ingampa, ante wædinque mōnō waocabo edonque aquēnēmō īmōmopa. Īñæmpa ēñēnāmaī intābopa, ante ædō cæte anguiī.

<sup>21</sup>Wængongui ingante do ate bai ingāināni incæte waodāni tōmengā ingante edæ, Bitō Wængongui nāō ēmōnōmī īmīpa, ante edæ ānāmaī īnōnānimpa. Wængongui ingante waa ate pōnente apænedāmaī īnōnānimpa. Mānōmaī ocai ōmæcadāni bai mīmō ōmædēnāni bai badīnque tōmēnāni

wentamö entawënäni bagadänimpa.  
<sup>22</sup>Ocai encamöni imönipa, ante änäni incæte tömënäni wæætë mänömaï cædinque ocai ömæcadäni bagadänimpa.  
<sup>23</sup>Edæ Wængongui wänämaï nê Quëwengaingä iñongante tömënäni wæætë godö Baa angadänimpa. Tömengä nänö nïä ömönö ante piinte cædinque tömënäni wæætë waomö nê wæwocamö mönö ömönö bai badöninque, öömä ëñadäni nani ömönö bai badöninque, ocagui ëñadäni nani ömönö bai badöninque, ocagui ömaadäni nani ömönö bai badöninque tömënäni, Mönitö wængongui ingampa, ante cædönänimpa.

<sup>24</sup>Mänömaï cædäni ate wædinque Wængongui, Minitö mini cæinente wædö ante ee abo cæcæminimpa, ante da godongä wadæ godinque tömënäni baonga nani nïömæi mongæante quëwenguinque cædönänimpa. Ìninqe nana gæncaya nana gæncaya nani monguënënö ante Baa ante guïñëñadämaï inte cædinque wacä ingä wacä ingä godö wiwa cædönänimpa. <sup>25</sup>Wængongui näwangä pöni nänö apænegaïnö ante tömënäni Baa äninque mä pönëninque nani babæ apænegaïnonque ante Ao änönänimpa. Mänömaï cædönäni inte tömënäni wæætë Wængongui nänö nê badongaincoo weca ædæ wææninque, Mönitö wængongui impa, ante cædinque nê Badongaingä ingante edæ ömö cæte wadæ gogadänimpa. Incæte tömengä nê Badongaingä iñongante mönö waocabo inguipoga mönö quëwëñedë ayæ ate miinguipo bayonte wantæpiyæ mönö quëwëñedë Wængongui ingante, Bitö tömëmi toquinque pönö waa cæbi æmönipa, ante mönö apænecæimpa. Mänömaï impa, ante Amëë, ämopa.

<sup>26</sup>Mänömaï cæyönänite Wængongui, Minitö guïñëñadämaï mini toinente wædonque gobæwedäni, ante da godongä gogadänimpa. Ìninqe onquiyænäni incæ, Nê onquiyæmo inömo inte botö onguïñængä tönö monguënëmo imopa, ante änämaï

inäni inte godö wacä onquiyængä tönö towente möwënönänimpa.

<sup>27</sup>Ayæ onguïñænäni incæ adobai cædinque, Botö onguïñæmo inömo inte onquiyængä tönö monguënëmo imopa, änämaï inäni inte godö wacä onguïñængä tönö möinente gonga bæco bai toinente wædäni bagadänimpa. Ìninqe cöwë nani waa quëwenguënënö ante Baa äninque nani onguïñæncabo inönäni inte wiwa cædönänimpa. Mänömaï cæyönänite Wængongui eyepæ pöni godö pangä wædinque tömënäni wiwa nani cædö beyænque nämä baonga caate wæwengadänimpa.

<sup>28</sup>Wængongui ingante mönö pönente ëñengæimpa, ante tömënäni, Önonquedö ante impa, ante tedeyönänite Wængongui wæætë, Ocaidë wentamö encadömïni inte edæ waomïni mini wïi cæquënënö incæ ee abo cæbæwedäni, ante da godongä gogadänimpa.

<sup>29</sup>Tömënäni iñömö nö cæquinämaï inäni inte do wiwa cædänique badinque iïmaï cædänipa. Wacä ingä godö towëninque tömënäni wadäni inänite nê wënæ wënæ cædänique inänipa. Mäincoo ante æinente wæwënäni inte tömënäni, Wacä gomonga ængä ingante godö piinte adänipa. Ayæ edæ, Mönö godö wænologæimpa, ante cædinque do cædänipa. Guëädö guëa piinte cædänipa. Wacä oda cæcæcäimpa, ante ancaa cædinque tömënäni godö babæ cædänipa. Ayæ nê wiwa pönëwënäni inte tömënäni, Wadäni wæcædänimpa, ante godö piinte cædänipa. Godö wæntaa godö wæntaa tedewënäni inänipa. <sup>30</sup>Ayæ wadäni inänite piïninque iïnäni iñömö godö babæ ante tedewënäni inänipa. Wængongui ingante piinte cædäni inänipa. Ayæ, Tömëmoque waëmö imopa, ante nämä ængö cæte bai cædinque wadäni inänite wææntodonte bai äninque, Önonquedö cæcantedö abii, ante godö piinte todäni inänipa. Edæ, Æbänö godömenque wënæ wënæ cæte toquimoo, ante edæ pönëë cöinque edæ nanguï cædänipa. Mæmpocä tönö badä, Cæedäni, äñöñate tömënäni ëñëñämaï

cädänipa. <sup>31</sup>Mimö ömädänäni inte tömənäni ocai ömæcadäni bagadänimpa. Cæcæboimpa, äninque edæ iinque cädämaï inönänimpa. Wacä caate wæcä adinque godö waadedämaï inönäni inte tömənäni edæ godömenque piïnäni inte cädönänimpa.

<sup>32</sup>Mänömaï cädäni iïnömö näni wænguinque cädänipa, ante Wængongui nö pönï nänö angainö ante tömənäni önömoncaque në ëñənäni inte tömənäni näni wənæ wənæ cæinənouque ante cädänipa. Ayæ tömənäni wiwa näni cædö bai wadäni adobaï cädäni adinque tömənäni, Waa cæminipa, äninque në cädäni inänite waa adänipa.

**Nöingä ante Wængongui  
apænte angampa, ante**

**2** <sup>1</sup>Tömənäni mänömaï cädänipa. Incæte bitö adobaï wiwa cädömi inte tömëmi pante wæquinque tömənäni inänite apænte ämipa. Ìninque bitö wacä ingante, Bitö pante wæquinque wiwa cæbipa, ante apænte ämi inte bitö iïnæmpa adobaï wiwa cädömi inte edæ æbänö cæte nämä ante wææ anguimii. <sup>2</sup>Wiwa cädäni inänite apænte äninque Wængongui cöwë nöingä ante apænte angampa, ante edæ do ëñëmompä. <sup>3</sup>Ìninque waobi önömique inömi inte bitö iïnæmpa tömənäni inänite apænte ämi incæte tömənäni näni cædö bai adobaï cädömi inte edæ, Wængongui botö imote pänämaï inte ata cæpocæcäimpa, ante pönëmitawo. <sup>4</sup>Bitö wiwa cæbi inte Ca ca wæquënëmi iïnömite Wængongui wæætë ee pänämaï inte nanguï waadete pönö cæyongante bitö wæætë edæ piïninque Baa ämitawo. Ìnæmpa tömengä, Bitö, Æmæwo wənæ wənæ cætabopa, ante wædinque botö gämænö poncæbiimpa, ante Wængongui pönö waadete cæcampa, ante pönëmiyaa.

<sup>5</sup>Incæte bitö mimö ömädëmi inte ancaa Baa äninque edæ wənæ wənæ bitö cædö ante ñimpo cädämaï iïnömite Wængongui nänö ænguï baquïönæ iinque bayonte tömengä ænguï

pönï badinque godömenque pangä wæcæbiimpa. Tömengä æbänö nö apænte angäa, ante mäniñedë ate edæ edonque acæiimpa. <sup>6</sup>Edæ, Tömämö mönö cægai ganca ante Wængongui eyepæ pönï pædæ pönongä æncæmöimpa, ante dodäni näni yewæmongainö bai edæ iinque bacæiimpa.

<sup>7</sup>Ìninque, Mönö ñäö bai entawengæiimpa, ante cædinque ayæ, Wængongui mönö imonte waa adinque pönö cæcä ate mönö wæwocädämaï ëwocacæiimpa, ante cædinque mönö wæntædämaï inte ee waa cæte quëwëmö iinque Wængongui pönö cæcä ate mönö cöwë wänämaï quëwëmaïmompä. <sup>8</sup>Wæætë, Wængongui näwangä nänö apænedö ante Baa äninque, Tömëmo beyænque quëwencæboimpa, ante në änäni inänite ayæ wadäni wiwa näni cæquïnonque ante në tee empote godäni inänite Wængongui ænguï badinque godö piïnte cæcæcäiimpa. <sup>9</sup>Edæ mönö waocabo wənæ wənæ cæmö adinque Wængongui oodeomöni iïnömönite täno päninque oodeomini inämaï imini iminite adobaï päñongä në wənæ wənæ cæmö tömämö iïnömö edæ caate wæwencæmöimpa. <sup>10</sup>Wæætë waa cæmö adinque Wængongui oodeomöni imönite täno pönö waadete cædinque oodeomini inämaï imini iminite adobaï pönö waadete cæyongä në waa cæmö wæætë gänë entawëninque ñäö apäite bai entawëñömonte edæ Wængongui tömämö imonte waa acæcäiimpa.

<sup>11</sup>Edæ mönitö oodeomöni imöni incæ minitö oodeomini inämaï imini incæ Wængongui tömämö imonte adoyömö pönï adinque wadö wadö ate pönente cädämaï ingampa. <sup>12</sup>Möitee wodi, Ìmaï cæedäni, ante nänö wææ angainö ante ömæmoncadäni inte wiwa cädäni iinque tömengä nänö wææ angainö dæ ante bai mäninäni wæncädänimpa. Wæætë Möitee wodi nänö wææ angainö ante do ëñente ëmoncadänäni incæte wiwa cädäni adinque Wængongui mäñine ante ëñänämaï cädäni beyænque apænte

āninqwe pangā wæcædānīmpa. <sup>13</sup>Edæ Mōitee wodi nānō wææ angainō ante önōmoncaque ēñēnāni inte tōmēnāni nāni önōmoncaque ēñēnō beyænque Wængonguī ayongā dicæ nō cædāni badāniyaa.

Wæætē edæ mǎnīne ante ēñente cædāni inānite guiquēnē Wængonguī pōnō angā ate tōmēnāni īñōmō nō cædāni bacædānīmpa. <sup>14</sup>Edæ Mōitee wodi nānō wææ angainō ante ōmæmoncadāni inte oodeoidi ināmaī ināni incæ pancadāniya tōmēnāni dodāni nāni wææ angainonque ante Ao ante cædinque Wængonguī nānō wææ angainō baī edæ do cædānīpa. Mǎnōmaī ēñente baī cædinque tōmēnāni mīmō entawēnāni inte mǎnīne ante ōmæmoncadāni ināni incæte nāmā nāni wææ ānonque ēñente cædānīpa. <sup>15</sup>Edæ, Tōmēnāni dodāni nāni wææ angainō ēñēninqwe waa cædāni inte tōmēnāni Wængonguī nānō wææ angainō baī do entawēnānīpa, ante edonque acæīmpa. Mīmō entawēnāni inte tōmēnāni nāni caboque godongāmæ pōnēninqwe wēnæ wēnæ nāni cædōnō ante nāēmæ apænte wææ ānānīpa. Ayæ wæætē waa cædāni ate tōmēnāni nāēmæ apænte nīmpo cædānīpa.

<sup>16</sup>Codito ingantedō ante watapæ ēñengaīmo inte botō īīmaī ante apænebopa. Wængonguī angā ēñente cædinque Itota Codito wæætē waomō mōnō awēmō entawēnō ante edonque pōnī adinque apænte ancæcāīmpa. Tōmēngā nānō apænte anguiōnæ īinque bayedē edæ mǎnīnō ante botō yewæmonte apænedō baī edæ īinque bacæīmpa.

**Mōitee nānō wææ angainta  
adinque oodeoidi wīī ēñēnāni**

<sup>17</sup>Bitō īñōmō edæ, Oodeobo īnōmo īmopa, ante āmīpa. Ayæ, Mōitee wodi nānō wææ angainta nē ēñēmo inte botō Wængonguī ayongante waa quēwēmo īmopa, ante edæ nāmā ængō cædinque āmīpa. <sup>18</sup>Wængonguī æbānō angāā, ante do ēñēmīpa. Ayæ tōmēngā nānō

wææ angainō ante do ēñēmi inte bitō, Quīnō waa ī, ante do ēñēninqwe Ao ante æmīpa. <sup>19</sup>Bitō, Wadāni babetamō baī ewocayōnānite botō tōō æmænte māobo godānīpa. Wēmō īñōmō quēwente baī adāmaī īñōnānite botō īñōmō, Acæmīnīmpa, ante tīca ēnente baī odōmonte apænebopa, ante edæ, Nāwangā āmopa, ante bitō apænebitawo. <sup>20</sup>Ayæ adobaī, Mōnō Mōitee wodi nānō wææ angainō ante ēñente beyænque mōnō ēñēnguēnēnō ante entawēninqwe mōnō nō cæquēnēnō ante adobaī tōmānō ante entawengæīmpa, ante bitō pōnēmitawo. Ayæ mǎnōmainō ante bitō pōnēnō beyæ bitō, Nē oda cædāni inānite botō nē tōīngā odōmōmo īmopa, ante pōnēmitawo. Wēñānāni baī wædænque ēñēnāni īñōnānite botō nē odōmonte apænebo īmopa, ante pōnēmitawo.

<sup>21</sup>Īñæmpa mǎnōmaī īnōmi inte bitō edæ dicæ nāmā odōmonte apænete ēñēmitawogaa. Wadāni inānite odōmonte apænedinqwe, Awēmō ænāmāī īedāni, ante odōmonte apænedōmi inte tōmēmi awēmō æmitawo. <sup>22</sup>Bitō wadāni inānite odōmonte apænedinqwe, Nānōogængā ināmaī īñongante godō guēa mōnāmāī īe, ante nē wææ āmi inte bitō adobaī wacā tōnō guēa mōmitawoo. Ayæ, Wængonguī ingampa, ante nāni badōīnca ante nē pīīmi inte bitō edæ tōmēnāni nāni apæneincōnē go guīdinque edæ ō æmitawoo. <sup>23</sup>Īñæmpa bitō, Mōitee wodi nānō wææ angainō ante botō ēñente cæbo īmopa, ante tēdēdinque nāmā ængō cædōmi inte edæ mǎnīne ante ēñēnāmāī cæbi adinque wadāni wæætē Wængonguī ingante waa adāmaī inānīpa tōō. <sup>24</sup>Edæ, “Mīnitō cædīnō beyæ oodeoidi ināmaī ināni incæ Wængonguī ēmōwo ante godō babæ ante wēnæ wēnæ ānewēnānīpa,” ante tōmēngā beyæ dodāni nāni yewæmongainō baī do batīmpa.

<sup>25</sup>Edæ Wængonguī nānō wææ angainō ante ēñente cæbi īninqwe bitō, Nāwā oodeobo īmopa, ante nē ēō togæīmi badīnque waa īmāīmpa. Wæætē edæ

ēñēnāmaī cæbi ininque oodeo ināmaī ingā bagāacā ingā bai bitō iñōmō edæ do babaīmipa. <sup>26</sup>Oodeoidi ināmaī ināni guiquēnē bagaadāni ināni incæte tōmēnāni Wængonguī nānō wææ angainō ante ēñente cædāni ininque Wængonguī ayongā tōmēnāni do ēō togæināni bai inōnāni inte oodeoidi bai inānīpa. <sup>27</sup>Bitō iñōmō Mōitee wodi nānō wææ yewæmongainta mānīmi inte nē ēō togæīmi imitawo. Bitō mānōmaī īmi incæte ēñēnāmaī cæbi iñōmi wacā wæætē bagāacā inongā inte ēñente cæcā ininque tōmengā ēñente nānō cædō beyænque Wængonguī wæætē bitō imite apænte āninque pancæcāimpa.

<sup>28</sup>Iñæmpa oodeo ēñagaingā inte baō beyænque oodeocā ingā incæte tōmengā wīi mānōmaī ingā beyænque nāwā oodeocā ingampa. Adobaī nē ēō togæingā iñōmō baonque nānō ēō togæinō beyænque tōmengā Wængonguī ayongā ædæmō ēō togæingā bai wīi ingampa. <sup>29</sup>Wængonguī Ōnōwoca ingante nē ēwocacā guiquēnē tōmengā iñōmō edæ nāwā oodeo bai badinque Wængonguī wēñængā ingampa. Edæ Mōitee wodi nānō wææ yewæmongainō ante ēñente ēō togæninque waocā tōmengā wentamō nānō entawēnō dicæ wido cæquingā. Wængonguī Ōnōwoca guiquēnē pōnō wido cæcā beyænque waocā wæætē waēmō entawengampa. Mānōmaī entawengā ingante wadāni waa adāmaī ināni incæte Wængonguī wæætē, Bitō waa entawēmi abopa, āninque tōmengā ingante waa apænecampa.

**3** <sup>1</sup>Ininque oodeocā iñōmō edæ, Oodeobo īmopa, ante toquēnengā ingantawo. Ayæ adobaī, Botō ēō togæīmo īmopa, ante toquēnengā ingantawo. <sup>2</sup>Ao āmopa. Nē oodeoidi inōnāni inte tōmēnāni cōwē nanguī toquēnēnāni inānīpa. Edæ Wængonguī apænecā ēñengaināni inte edæ oodeoidi tōmengā nānō apænedō ante nē mangaināni inte nē toquēnēnāni inānīpa. <sup>3</sup>Mānōmaī ī incæte pancadāniya iñōmō edæ wede pōñēnāmaī inānīpa. Ininque

mōnō æbānō anguīi. Tōmēnāni nāni pōñēnāmaī inō beyænque Wængonguī tōmēnāni inānite dicæ ñimpo cædinque ædæmō aadāmaī ingantawogaa. <sup>4</sup>Ædō cæte mānōmaī inguīi. Mōnō waocabo tōmāmō nē babæ apænemō iñōmonte Wængonguī iñōmō nō pōnī cæcā ingainō anguēnē. Edæ tōmengā beyæ īīmaī ante yewæmongatimpa.

“Wængonguī bitō æbānō apænebiī, ante apænte ancæ cædāni incæte tōmēnāni, Wængonguī nō pōnī ante apænecampa, ante edonque acædānīmpa.

Bitō nē tæi ēmōmi inte edæ bitō imite nē apænte ancæ cædāni inānite nāēmæ edæ wææntodontē bai cædinque edæ gānā cæcæbiīmpa.”

Ante nāni yewæmongainō bai edæ bacæimpa.

<sup>5</sup>Waadāni mā pōñēninque īīmaī ante tedewēnānīpa. Mōnitō wīwa cæyōmōnite Wængonguī nō cæcā adinque wadāni, Wængonguīnque nē nō cædongā ingampa, ante godōmenque edonque acædānīmpa. Ininque wīwa cæyōmōnite Wængonguī quīnante piīnte pangāā, ante tedewēnānīpa. Mānōmaī tedewēnāni adinque mōnō wæætē æbānō anguēnēmō imōō. Iñæmpa waodānique nāni ānewēnō bai dicæ anguēnēmō imongaa. <sup>6</sup>Ædō cæte mānōmaī ānewenguīi. Mānīnō nāni tedewēnō nāwangā ī bai inguipoga quēwēmō imonte Wængonguī apænte ānāmaī inguēnengā.

<sup>7</sup>Wadāni guiquēnē īīmaī ante tedewēnānīpa. Wængonguī cōwē nāwangā ante apæneyongante botō babæ apænebo adinque wadāni, Wængonguīnque nāwangā ante apænecampa, ante tōmengā ingante godōmenque waa acædānīmpa. Ininque babæ botō apænedō beyænque Wængonguī godōmenque ñāō apāite bai ēmongā ingampa. Ininque, Bitō nē wēnæ wēnæ cæbi īmipa, ante Wængonguī quīnante botō imote apænte angāā, ante tedewēnānīpa. <sup>8</sup>Tōmēnāni, Wængonguī

ingante godömenque waa acädänimpa, ante mönö godömenque wënæ wënæ cæcæimpa, ante tedewënänipa. Tömënäni näni tedewëno näwangä i bai mönitö adobaï ante ancädömönimpa. Edæ, Tömënäni näni tedewëno bai edæ Pabodoidi adobaï ante apænedänipa, ante pancadäniya pönö wënæ wënæ ante babæ apænedänipa. Mänömai ante nê apænewënäni inänite päniinque Wængongui nö cæte pangampa.

**Tömämö mönö pante wæquinque wentamö mongæmomp**

- <sup>9</sup> Ìniinque æbänö ante anguii. Minitö oodeoidi inämai önöminique inöminite mönitö möni oodeocabo dicæ godömenque waa pönï imöniyaa. Inæmpa mönitö oodeomöni incæ minitö oodeomini inämai imini incæ tömämö nê wënæ wënæ cædömö imompa, ante do odömonte yewæmömöni abaiminipa. <sup>10</sup> Edæ iïmai ante Wængongui beyæ ante ämotamini ante bai yewæmongatimpa. “Nê nö cædongä inömö edæ dæ angampa. Adocanque incæ edæ dæ angampa. <sup>11</sup> Nê ëñente pönengä inömö edæ dæ angampa. Wængongui ingante ante nê diqui diqui minongä inömö edæ dæ angampa. <sup>12</sup> Tömänäni edæ oda cæte wapiticæ godinque, näni waa cædämai incaboque badänitapa. Nê waa cædongä inömö edæ dæ angampa. Adocanque incæ edæ dæ angampa. <sup>13</sup> Waodäni inänite wænoncæte ante ææ ænete bai emencadinque, tömänäni babæ ante enguënëwate tedewënänipa. Edæ tæntæ tömëmæ ënete bai, Wængongæimpa, ante ënedänipa. <sup>14</sup> Tömënäni piïnte näni tedewëno beyænque moncapæ ti nä bai enguënëwadänipa. <sup>15</sup> Tömënäni wængonguiwaque pogodo goquiwaque ëwadänipa.

- <sup>16</sup> Tömënäni nê godö wænönäni inte mäincoo wido cæte wodii godäni ate edæ miï quëwënäni ponte adinque caate bai wæwënänipa. <sup>17</sup> Nê piïnte cædönäni inte tömënäni Wængongui taadö tömengä gänë entawente nänö godönö ante adämai inte cædänipa. <sup>18</sup> Tömënäni, Wængongui ingante mönö guifente ëñengæimpa, ante pönënämai inänipa.”

Ante dodäni näni yewæmongainö bai impa.

<sup>19</sup> Æcänö Möitee wodi nänö wææ angainö ante nê ëñente quëwenguënëna inaa tömengä beyænque ante wææ yewæmongatimpa. Mänömai i beyæ, Botö eyepæ cæbo imopa, ante mönö ædö cæte anguii. Edæ guifënete mönö pæ wëñecæimpa. Ayæ inguipoga tömäo quëwëmö tömämö Wængongui nê apænte angä weca ongöniinque edæ, Æbänö cætaboo, ante Wængongui ingante mönö edonque apænequënëmö imompa. Mänömainö ante edæ do ëñëmomp. <sup>20</sup> Mänömai beyæ Wængongui, Möitee wodi nänö wææ angainö ædæmö ëñente cæbi beyæ bitö botö ayömo nê nö cæbi babipa, ante adocanque ingante edæ änämai incæcæimpa. Wæætë mänine nänö wææ angainö ëñente beyæ mönö, Nê wënæ wënæ cæmö imompa, ante edonque amompa.

**Mönö wede pönëno beyænque nö cæte quëwëmomp, ante**

<sup>21</sup> Wiï Möitee wodi nänö wææ angainö ante ëñëmini beyæ wæætë edæ Wængongui incæ pönö badongä beyænque mönö tömengä ayongä nö cæmö bamomp, ante nïwo pönï odömongatimpa. Dodäni Möitee wodi tönö Wængongui beyæ nê apænëgainäni inömö, Iincayæ ate mänömai bacæimpa, ante do yewæmongadänimpa. <sup>22</sup> Wængongui pönö badongä ate mönö nê wede pönëmö inömö Itota Codito ingante mönö wede pönëno beyænque edæ tömämö tömengä ayongä nö cæmö

bamompa. Edæ mönō adoyömō ingaimō inte önōmonque imompa. <sup>23</sup>Īnīnque mönō tömāmō wēnæ wēnæ cæmō inte Wængongui nānō ñāō bai quēwēñomō guicæte ante cædinque wīī eyepæ cæmō inte wīī guimompa. <sup>24</sup>Incæte Itota Codito ængā beyænque abæ tawænte gote bai quēwēmō ĩñōmonte Wængongui ōnonque ānāmaī inte waadete pōnō badongā ate mönō tömengā ayongā nō cæmō bamompa. <sup>25</sup>Wængongui ĩñōmō Itota Codito ingante da pōnōnīnque, Tömengā mīnitō wēnæ wēnæ cædō ante teēmente wængā beyænque botō wæætē piyænē cædinque mīnitō imīnite pānāmaī incæboimpa, ante cægacäimpa. Īnīnque tömengā, Mānōmaī pōnō cæbo ate mīnitō, Itota wepæ mönō beyæ pe tæ pe tæ wæænīmpa, ante wede pōnēnīnque wede mīni pōnēnō beyænque quēwencæmīnīmpa, ante pōnō cægacäimpa.

Mānōmaī cædinque Wængongui wēñēñedē mönō waocabo mönō wēnæ wēnæ cægāinō ante ee adīnque nē pānāmaī ingaingā incæte edæ, Botō cōwē nöingā ante apænte ānōmo imopa, ante ēñencæmīnīmpa, ante odōmongacäimpa. <sup>26</sup>Īnīnque, Wængongui nē nō cæcä ĩnongā ingampa, ante mönō acäimpa. Ayæ adobai, Itota ingante nē pōnēmō ĩñōmonte Wængongui nē panguēnengā ingā incæ mönō imonte ata cæpōdinque pōnō badongā ate mönō wæætē tömengā ayongā edæ nē nō cæmō bamompa, ante mönō acäimpa. Īnīnque tömengā mānōmaī cædinque tömengā nō nānō cædō ante odōmoncæte ante ñōwo cægacäimpa.

<sup>27</sup>Īnīnque mönō waocabo ĩñōmō nāmā ængō cæte bai cædinque mönō, Nāmā cædinque nō cæmō bamompa, ante ædō cæte anguimōō. Īñæmpa mānōmaī ānīnque cædāmaī ingäimpa. Quinante nāmā wīī ængō cæquīī, ante wæmīnitawo. Mōitee wodi nānō wææ angāinō ædæmō ēñente cæmō inte bai mönō, Tömēmō cætamompa, ancædōmōimpa. Incæte

ædæmō ēñente dicæ cæmongaa. Wæætē tömengā ingante wede mönō pōnēnō beyænque tömengā ayongā nō cædōmō bamompa, ante adīnque mönō, Tömēmō cætamompa, ante ædō cæte anguīī.

<sup>28</sup>Īñæmpa waocä Wængongui nānō wææ angāinō ante ēñente cæcä incæ wīī tömengā nānō ēñente cædō beyæ nē nō cæcä bacampa. Wæætē wede nānō pōnēnō beyænque Wængongui ayongā edæ nē nō cæcä bacampa, ante do edæ apænebo ēñēmaimīnīpa.

<sup>29</sup>Oodeomōni ĩñōmōnīte Wængongui mōnitō Wængongui ĩnongā ingampa. Oodeomīni ĩnāmaī imīni guiquēñē, Wīī mōnitō Wængongui ingampa, ante pōnēmīnitawo. Īñæmpa oodeomīni ĩnāmaī ĩñōmīnīte adocä Wængongui mīnitō Wængongui ingampa. <sup>30</sup>Edæ adocanque Wængongui ĩnongā ingampa. Īnīnque nē ēō togæimōni imōni mōni wede pōnēnō beyænque tömengā pōnō badongā ate tömengā ayongā edæ nō cæmōni bamōnīpa. Adobai bagāamīni mīni wede pōnēnō beyænque Wængongui adocanque ĩnongā inte pōnō badongā ate mīnitō adobai tömengā ayongā nō cæmīni bamīnīpa. <sup>31</sup>Mōnō pōnēnō beyænque ĩmpa, ante apænedīnque mōnitō Wængongui nānō wææ angāinō ante dicæ wēā godonte bai cæmōnīyaa. Wīī mānōmaī cæmōnīpa. Wæætē mānōmaīnō ante apænedīnque tömengā nānō wææ angāinō ante Ao ānīnque mōnitō, Ēñēedāni, ante odōmonte apænemōnīpa.

#### Abadäo wodi æbänō cægacäi, ante pōnengäimpa

**4** <sup>1</sup>Mānīnō ante mōnitō mæmæ Abadäo wodi ĩñōmō æbänō ante ēñengacäi, ante mönō ñōwo pōnente apænecäimpa. <sup>2</sup>Abadäo wodi nē ēñente cæcä ingaingā incæte tömengā nānō ēñente cædō beyænque dicæ nō pōni entawengā bacantawogaa. Mānōmaī cædinque nō cæcä bagacäimpa, ante nāwangā ĩ bai tömengā waodāni ēñēñōnānīte, Waa cæbo imopa, ante do ancægacäimpa. Incæte tömengā



Wængonguī ēñēñongante mäninō ante cōwē ānāmai inguēnengā ingacāimpa. <sup>3</sup>Wængonguī æbānō ante apænecā ēñente yewæmongadāni, ante aminii. Edæ iīmai ante apænecā ēñente yewæmongadānimpa. “Wængonguī nōingā ante apænecampa, ante Abadāō wede pōnengacāimpa. Īninqe tōmengā wede nānō pōnēnō beyænque Wængonguī wæætē edæ, Botō ayōmo Abadāō nē nō entawengā ingā abopa, angacāimpa,” ante yewæmongadānimpa.

<sup>4</sup>Edæ wadāni beyæ waocā nanguī cæcā ate tōmēnāni debe badīnāni inte edæ, Ōnonque pōnōmōni æe, ante ædō cæte anguīnānii. Īñæmpa wīī ōnonque godonte impa. Wæætē tōmengā nānō nanguī cædinō beyænque paga ante nē godonguēnēnāni inte awēnēidi, Bitō nanguī cæbitapa, ante godōnāni ængampa. <sup>5</sup>Wængonguī guiquēnē ōnonque pōnō cæcā æmōimpa. Waocā wīwa cæcā incæ wede pōnengā adinqe Wængonguī pōnō badongā ate tōmengā Wængonguī ayongante wæætē nō cæcā bacampa. Īninqe waocā waa cædāmai incæ edæ wede pōnengā adinqe Wængonguī wæætē tōmengā ingante pōnō badōninqe, Nō pōnī bitō entawenguinge bitō wede pōnēmi abopa, angampa. <sup>6</sup>Waocā waa cædāmai ĩñongante Wængonguī pōnō badongā ate tōmengā Wængonguī ayongā nō pōnī entawengā ĩninqe tōmengā watapæ quēwencæcāimpa, ante apānedinqe Dabii wodi adobaī āmotamīni ante baī yewæmongacāimpa.

<sup>7</sup>Adocā yewæmōninqe,

“Waodāni ēñēnāmai cædāni inānite  
Wængonguī pōnō ñimpo cæcā ate  
tōmēnāni wæætē watapæ  
quēwencædānimpa.

Edæ tōmēnāni ēñēnāmai nāni cædō  
ante ō ænte māo tee moncate baī  
cæcā adinqe nanguī tocædānimpa.

<sup>8</sup>Æcānō ingante Wængonguī, Bitō pante wæquinque wēnæ wēnæ cæbipa, ante cōwē piinte ānāmai ingā ĩninqe māningā waocā wæætē nanguī tocæcāimpa.”

<sup>9</sup>Ante Awēnē Dabii wodi, Eō togæñinānique tocædānimpa, ante dicæ yewæmongantawogaa. Bagādāni adobaī tocædānimpa, ante ancæte ante yewæmongacāimpa. Abadāō wodi Wængonguī ingante wede nānō pōnēnō beyænque Wængonguī, Botō ayōmo Abadāō nē nō entawengā ingā abopa, angacāimpa. Mānōmainō ante edæ botō do yewæmōmo abaīmīnīpa. <sup>10</sup>Abadāō wodi æbānō engæñongante Wængonguī mānōmai angacāi. Dicæ eō togæningā ĩñongante angantawogaa. Wæætē bagāacā ĩñongante angacāimpa. <sup>11</sup>Īninqe, Abadāō bagāacā inte wede pōnengā beyænque botō pōnō badōmo ate nō cæcā bacampa, ante ēñencædānimpa, ante cædinque Wængonguī angā eō togænte bagacāimpa.

Mānōmai cæcā beyæ mīnitō bagāmīni inte wede pōnēmīni ĩñōmīni Abadāō wodi mīnitō wæmængā baī bagacāimpa. Abadāō wodi pæīmīni baī wede pōnēmīni adinqe Wængonguī adobaī, Nō entawēmīni bamīni acæboimpa, ante pōnō badongacāimpa. <sup>12</sup>Mōnitō wæmæ Abadāō wodi doyedē bagāacā ingāñedē incæ wede pōnengā ingacāimpa. Mōni idægocabo ĩñōmō nē eō togæimōni inte edæ tōmengā wede pōnente nānō cængongainō adodō tee empote gomōnīpa. Īninqe mäninōnō mōni wede pōnente godōnō gomōni beyænque mōni eō togæncabo wæmængā adocā Abadāō wodi ingacāimpa.

**Mōnō wede pōnēnō beyænque  
Wængonguī nānō angainō  
ante cæcampa, ante**

<sup>13</sup>Wængonguī, Inguipoga incæ bitō nē ænguīmi incæbiimpa, āninqe Abadāō wodi tōnō tōmengā nānōmōidi inānite pōnō angā ængadānimpa. Mānōmainō āninqe Wængonguī dicæ, Botō wææ angainō ante ēñente cædānique æncædānimpa, ante angantawogaa. Wæætē edæ wede pōnente tōmengā ayongā nō entawēnāni badāni

beyænque Wængongui, Inguipoga incæ pönömo æncæminimpa, ante apænegacäimpa. <sup>14</sup>Wængongui dicæ, Botö wææ angainö eñente nê cæðanique nê ænguïnäni inänipa, ante angantawogaa. Edæ mänömainö angä bai mönö wede pönönö ante önonque pönencæðömöimpa. Tömengä nänö angainö incæ wo ewente bai bacæðönimpa. <sup>15</sup>Edæ mäninö tömengä nänö wææ angainö ante eñenämai cæðäni beyænque Wængongui ængui badinque pangampa. Wæætê wææ änämai inte bai Wængongui, Botö wææ angainö ante eñenämai cæbipa, ante ædö cæte anguingää. Edæ dæ ancæðönimpa.

<sup>16</sup>Mänömai beyæ Wængongui, Botö waadete pönö cæðö beyænque æminipa, ante edonque acäimpa, ante cæðinque Abadäo wodi wede nänö pönönö beyænque ante, Pönömo æncæminimpa, angacäimpa. Mönitö Móite wodi nänö wææ angainö ante nê eñëmöni iñömönite wiï adomönique imönite angacäimpa. Wæætê Abadäo wodi nänö wede pönengai bai adobai wede pönëmö iñömönte mönö tömämö imonte Wængongui, Cöwê pönömo æncæminimpa, angacäimpa. Edæ mönö wede pönencabo iñömönte Abadäo wodi tömämö wæmængä bai ingacäimpa. <sup>17</sup>Wængongui edæ do wængainäni inänite pönö cæcä ate tömënäni iñömö nñani ömæmonte edæ miïnäni quëwënanipa. Dæ angaincoo incæ tömengä do badongä ate edæ a ongoncoopa. Wængongui mänömai nê badongä iñongante Abadäo wodi tömengä ingante nê wede pönengä ingacäimpa. Ininque Wængongui, “Abadäo eñëmi. Botö pönö badömo ate bitö pæinäni yebæinque wacabodäni nñani cabo wacabodäni nñani cabo nangui inäni iñönänite edæ bitö adobique tömënäni wæmæmi incæbiimpa.” Ante Wængongui beyæ ante yewæmongatimpa. Ininque Wængongui ayongante mönö wede pönëmö iñömönte Abadäo wodi mönö wæmængä bagacäimpa.

<sup>18</sup>Tömengä ingante, “Bitö pæinäni edæ mänimpodäni bacæðänimpa,” ante Wængongui do angacäimpa. Mänömainö angä eñëninque, Ædö cæte baquii, ante wædongä incæ Abadäo wodi, Wængongui cöwê cæcä beyæ watapæ bacäimpa, ante wede pönengä ingacäimpa. Ininque tömengä wede nänö pönönö beyænque “wacabodäni nñani cabo wacabodäni nñani cabo nangui inäni bayönänite tömënäni wæmængä” Abadäo bagacäimpa.

<sup>19</sup>Tömengä, Botö picængadebo wodo tiëë wadepo quëwengaimo inte edæ botö baö wænte bai eñäbo inte edæ ædö cæte wëñæ tapæiquimoo, ante eñengacäimpa. Ayæ, Tada adobai wëñæ cöwê mänämai ingaingä inte picængadecä badinque ædö cæte wëñæ manguingää, ante pönengacäimpa. Incæte mäninö nänö wæðö beyænque guiñëñadämai inte Abadäo wodi Wængongui nänö äninö ante godömenque pönengacäimpa.

<sup>20</sup>Tömengä, Wængongui wabänö cæbaingä, ante wæðämai inte wæætê Wængongui nänö, Cöwê pönö cæcæboimpa, äninö ante wede pönengacäimpa. Ayæ, Wængongui bitö nãö entawëmi inte tæi emonte waa cæcæbiimpa, ante godömenque tæi piñænte entawëninque Abadäo wodi wede pönengacäimpa. <sup>21</sup>Edæ, Wængongui nê tæi piñængö inte, Cöwê cæcæboimpa, ante nê angaingä inte edæ cöwê cæcæcäimpa, ante Abadäo do eñëninque edæ wede pönengacäimpa. <sup>22</sup>Tömengä mänömai wede pönengä beyænque Wængongui, Abadäo bitö nö entawëmi imi abopa, angacäimpa.

<sup>23</sup>Mänine, Bitö nö cæbi imi abopa, ante nänö angaine iñömö wiï tömengä beyænque yewæmongatimpa. <sup>24</sup>Wæætê mönö beyæ adobai yewæmongatimpa. Edæ, Mönö Awënë Itota ingante Wængongui angä nñani ömæmongacäimpa, ante nê angaingä ingante wede pönëmö iñömönte Wængongui, Botö ayömo minitö nö cæmini imini abopa, ante badongampa.

<sup>25</sup>Wēnæ wēnæ mōnō cædō beyænque mōnō Awēnē Itota ingante Wængongui pædæ godongä wængacäimpa. Ayæ mōnō beyæ ante cædinque tömengä mōnō Awēnē Itota ingante, Bitō nē nō cædōmi inte nāni ömæmōmi beyænque tömēnāni botō ayōmo nō entawēnāni bacædänimpa, ante cædinque angä nāni ömæmongacäimpa.

**Wængongui badongä ate  
mōnō nō cæmō bamompa**

**5** <sup>1</sup>Mōnō wede pōnēnō beyænque Wængongui pōnō badongä ate mōnō tömengä ayongante edæ nō cæmō bamompa. Īninqe mōnō Awēnē Itota Codito nānō cægainō beyænque Wængongui piyænē cæcä ate mōnō tömengä tōnō godongämæ gänē entawente quēwēmompa. <sup>2</sup>Mōnō wede pōnēnō beyæ adocä Codito mōnō imonte pōnō ænte māmongä ate Wængongui waadete pōnō cædinque mōnō imonte ængampa. Ayæ Wængongui nē nāō ãdongä weca ongōñōmō tömengä pōnō badongä ate mōnō godongämæ nāō ãmonte mōnō watapæ bacäimpa, ante wede pōnēninqe tomompa.

<sup>3</sup>Ayæ wīi māninqe beyæ tomompa. Īnæmpa, Waocä nānō wæntædāmaī inte ee cæquinque caate wæcampa, ante ãñēmō ĩninqe mōnō caate wæmō incæte caate mōnō wædō beyæ adobai tomompa. <sup>4</sup>Ayæ nē wæntædāmaī inte ee cæmō adinqe mōnō Wængongui ayongä nē waa cæmō edæ bamompa. Mānōmaī bamō ĩninqe mōnō, Watapæ bacäimpa, ante pōnente tomompa. <sup>5</sup>Mānōmaīnō ante nē pōnente tomō ĩñōmō edæ mōnō ænguēnēnō ante do æninqe mōnō guingo imonte wædāmaī ĩmompā. Edæ Wængongui tömengä Tæiyæ Wæmō Ōnōwoca ingante da pōnōninqe tömengä nānō waadete pōnēnō adobai do pōnongä æninqe mimōnē entawēmompa.

<sup>6</sup>Edæ ĩmaī impa. Mōnō aquīimō pōni ĩnōmo inte, Ædō cæte cæmōō, ante wæyōmonte mōnō Codito ĩñōmō eyepæ pōni pōninqe, Mīnitō Wængongui

ayongante wīwa cæmīni ĩminipa, ante adinqe wīwa mōnō cædō ante teēmente wæætē wængacäimpa. <sup>7</sup>Waocä guiquēnē wacä nē nō cædongä ingä adinqe tömengä beyæ wæætē dicæ wænguingäa. Incæte, Nē waa cædongä wæætē quēwencæcäimpa, ante cædinque adocanque adocanque wabānō Ao ante tömengä beyæ wæætē wæmainānipa.

<sup>8</sup>Incæte, Wængongui mīnitō ĩmīnite nangui waadete pōnengampa, ante odōmoncæte ante cædinque mōnō Codito ĩñōmō nē wēnæ wēnæ cæmō ĩñōmonte mōnō beyænque wæætē wængacäimpa. <sup>9</sup>Codito wepæ mōnō beyæ pe tæ pe tæ wææ beyænque mōnō Wængongui ayongante nō entawēmō do batomompa. Codito mōnō beyæ mānōmaī wængaingä inte cōwē godōmenque cæcæcäimpa.

Ämo ãñēedāni. Wængongui nē piĩnte panguēnengä ĩñongante adocä Codito gä pe æmpote ængä beyænque Wængongui wæætē mōnō imonte edæ ata cæpocä quēwencæmōimpa. <sup>10</sup>Mōnō edæ Wængongui tōnō mōnō godongämæ piĩncabo ĩñōmonte tömengä Wengä mōnō beyæ wæætē wængä beyænque mōnō Wængongui tōnō godongämæ piyænē cæmō bagamōimpa. Mōnō Wængongui tōnō godongämæ piyænē cæmō ĩninqe tömengä Wengä ĩñōmō cōwē godōmenque cæcæcäimpa. Ämo ãñēedāni. Tōmengä adocä do wængaingä inte nāni ömæmonte mīingä quēwēninqe mōnō imonte ængä beyænque mōnō wænāmaī inte cōwē quēwencæmōimpa. <sup>11</sup>Ayæ mōnō godōmenque ĩimainō ante ãñengæimpa. Mōnō Awēnē Itota Codito ængä beyænque Wængongui piyænē cæcä ĩninqe mōnō nōwo Wængongui nempo quēwēninqe edæ Itota Codito beyæ ante watapæ tomompa.

**Tānocä Adäo wodi bai Codito  
adobai Tānocä ingampa**

<sup>12</sup>Docä mæmæ adocanque tānocä incæ ãñēnāmaī cæcä ĩninqe mōnō wēnæ wēnæ cæpāmo inguipoga do

pongatimpa. Ayæ tömengä nänö  
 ëñëñämaï cægäinö beyænque nê  
 wæwocacä bagacäimpa. Tömengä wënæ  
 wënæ cæcä ingaingä bai mönö tömämö  
 adobaï nê wënæ wënæ cæmö imö  
 ïninqe edæ mönö waocabo tömämö nê  
 wæwocamö edæ do bagamöimpa. <sup>13</sup>Edæ  
 wëñëñedê Möitee wodi nänö wææ  
 änämaï iñedê incæ waodäni do wënæ  
 wënæ cædäni ingadänimpa. Wënæ  
 wënæ cædäni incæte Wængongui, Botö  
 wææ änö ante ëñëñämaï cæminipa,  
 ante adö cæte apænte anguingä. Ìñæmpa  
 mäniñedê ayæ wææ änämaï  
 ingacäimpa. <sup>14</sup>Nê Ponguingä, ante  
 dodäni nani nê angaingä iñömö  
 Tänocä nänö ingai bai docä Adäo wodi  
 adobaï tänocä ingacäimpa. Incæte  
 Adäo wodi Wængongui nänö wææ änö  
 ante ëñëñämaï cædinque wënæ wënæ  
 cægacäimpa. Wæætê Wængongui edæ  
 Möitee wodi nänö quëwenganca wææ  
 änämaï iñongante Adäo wodi pæinäni  
 guiquënë wënæ wënæ cædäni incæte  
 tömengä nänö ëñëñämaï cægai bai  
 wii adobaï ëñëñämaï cægadänimpa.  
 Incæte tömënäni nê wæwocadäni inte  
 wægadänimpa.

<sup>15</sup>Incæte Wængongui nänö wææ  
 angäinö ante adocanque nänö ëñëñämaï  
 cægai bai Wængongui nänö pönongai  
 iñömö wii adobaï impa. Edæ adocanque  
 nänö ëñëñämaï cægai beyænque nanguï  
 inäni inte wængadänimpa. Incæte  
 Wængongui guiquënë nanguï pöni  
 waadete pönö cædinque Itota Codito  
 ingante da pönongä pöninque tömengä  
 adocanque ïnongä waadete eyepæ pöni  
 pönö cæcä ate mönö nanguï pöni imö  
 inte quëwëmompä. <sup>16</sup>Onguiñængä  
 adocanque wënæ wënæ nänö cægai  
 beyæ nê wæwocadäni bagadänimpa.  
 Wængongui nänö pönongai iñömö  
 edæ wii adobaï impa. Adocanque  
 nänö adopoque ëñëñämaï cægäinö  
 ante adinque Wængongui tömengä  
 ingante apænte äninque edæ, Bitö  
 tente wæquinque impa, angacäimpa.  
 Wæætê Wængongui nänö wææ angäinö  
 ante ëñëñämaï wæætê wæætê cæmö

incæte tömengä, Botö ayömo mini nö  
 entawenguinque impa, ante önonque  
 pönongä ænte entawëmompä.

<sup>17</sup>Waocä adocanque incæ Wængongui  
 nänö wææ angäinö ante ëñëñämaï  
 cæcä ïninqe tömengä adocanque  
 nänö ëñëñämaï cægai beyænque  
 mönö wæwocamö do bagamöimpa.  
 Wængongui guiquënë godömenque  
 eyepæ pöni waadete pönö badongä ate  
 tömengä ayongä mönö nö entawëmö  
 bagamöimpa. Ìninqe Itota Codito  
 adobaï Adocanque iñongante mönö  
 tömengä nempo wæwocadämaï inte  
 quëwëninque awëñeidi bai badinque  
 quëwëmompä.

<sup>18</sup>Mänömaï beyæ adocanque  
 adopoque ëñëñämaï cæcä beyænque  
 Wængongui mönö tömämö imonte  
 apænte äninque, Mini wænguinque  
 wënæ wënæ cæminipa, angampa. Ayæ  
 adobaï Adocanque adopoque nänö nö  
 cægäinö beyænque mönö Wængongui  
 ayongä nö cæmö bamö ïninqe  
 Wængongui apænte äninque mönö  
 tömämö imonte, Mini quëwenguinque  
 minitö botö ayömo nö entawëmini  
 baminiipa, angampa. <sup>19</sup>Edæ adocanque  
 nänö adopoque ëñëñämaï cægai  
 beyænque mönö nanguï imö incæ edæ  
 nê wënæ wënæ cæmö bagamöimpa.  
 Adobaï Adocanque nänö adopoque  
 ëñente cægai beyænque mönö nanguï  
 imö incæ edæ Wængongui ayongä nö  
 cæmö bagamöimpa.

<sup>20</sup>Mönö waocabo wënæ wënæ  
 cæyömonte Wængongui, Botö wææ änö  
 ëñëñämaï inte cæminipa, ante edonque  
 acæminimpa, ante wææ angacäimpa.  
 Wææ angä ate edonque adinque mönö  
 waocabo wæætê, Nanguï ëñëñämaï  
 inte cæte awædö, ante wæyömonte  
 Adocä incæ godömenque nanguï  
 waadete pönö cæcä æmompä. <sup>21</sup>Ïninqe  
 mönö ëñëñämaï cægai beyæ mönö nê  
 wæwocamö bagamöimpa. Wæætê mönö  
 Awëñe Itota Codito waadete pönö nö  
 cæte badongä ate mönö cöwê wænämaï  
 quëwënguinque Wængongui ayongä nö  
 entawëmö bagamöimpa.

**Codito nempo quëwëninque  
mönö në wíwa cædongä  
nempo wíi quëwëmompä**

**6** <sup>1</sup>Ínínque mönö æbänö anguii. Pancadäniya iimaï änewënanipa. Wængongui godömenque waadete pönö cæcæcäimpa, ante cædinque mönö godömenque wënæ wënæ cæcæcäimpa, ante tedewënanipa. Mönö iñömö dicæ mänömainö ante tedewenguëñömö imongaa. <sup>2</sup>Iñæmpa ædö cæte mänömainö ante tedewenguuii. Wënæ wënæ mönö cæte quëwëmämo pædæ godömo ænínque Codito teëmë mongæñinque wæñongante mönö tömengä tönö godongämæ wænte bai inömo inte ædö cæte godömenque wënæ wënæ cæte quëwenguuii. <sup>3</sup>Mönö Itota Codito nempo quëwengæimpa, ante æpænë guidinque mönö tömengä tönö godongämæ wængaimö bai batamompä, ante minitö iñömö ëñënamai iminitawo. <sup>4</sup>Tömengä wænte öñöñongante Mæmpo Wængongui në ñäö entawënongä inte tæi emönongä inte, Ñäni ömæmöe, angä ñäni ömæmongacäimpa. Ínínque mönö iñömö edæ, Codito tönö ñäni ömæmonte bai mönö miimö quëwengæimpa, ante cædinque æpænë guidinque tömengä wodido godongämæ guite bai wænte bai öñontamompä. <sup>5</sup>Edæ tömengä wængä ate godongämæ wænte bai bagaimö inínque mönö tömengä ñäni ömæmongä ate tömengä tönö äawocaque bai ewocate ñäni ömæmonte bai quëwëmaimompä. <sup>6</sup>Wacä nänö në ö æninäni inte tömengä beyænque cæte në quëwënanai bai mönö adobai wënæ wënæ mönö cædö beyænque wægämöimpa. Mänömai inte wæyömonte mönö Codito iñömö, Aamö cæte gocæminimpa, ante cædinque wënæ wënæ cæte mönö wentamö mongæñö ö ænte teëmë mongængantapa. Ee mongæñongante tömengä ingante awäa timpodäni wængä adinque baonque ante mönö wënæ wënæ cæpämö iñömö ewente bai ba inínque mönö do aamö cæte bai mäninö ante

ëmö cæte gomompä. <sup>7</sup>Wacä æmæwo wængaingä inte edæ ædö cæte wënæ wënæ cæquingä. Edæ tömengä nänö wënæ wënæ cægainö ante ëmö cæte aamö cæte bai gogaingä ingampa.

<sup>8</sup>Mönö Codito tönö äawocaque bai ewocadinque adopoque wængaimö inte mönö tömengä tönö godongämæ quëwengæimpa, ante wede pönëmompä. <sup>9</sup>Edæ do wænte ñäni ömæmonte miingä quëwënongä inte Codito wæætë mempoga wænguingä inämai ingampa. Tömengä ñöwo wæwocadämai iñongante tömengä ingante, Wæmäwe, ante ædö cæte anguii. Iñæmpa, wænämai incæcäimpa, ante do ëñëmompä. <sup>10</sup>Tömengä adopoque wænínque mönö wënæ wënæ cægainö ante æmæwo wido cæcæte ante teëmë mongænte wængacäimpa. Wæætë ñäni ömæmonte miingä quëwëninque tömengä, Wængongui beyænque cæte quëwencæboimpa, ante quëwengampa. <sup>11</sup>Minitö adobai Codito nempo quëwënomini inte wiwa mini cægainö ante æmæwo wido cæcæte ante cædinque, Itota Codito tönö adopoque wængaimö imompä, ante wæætë, Mönö Wængongui beyænque cæte quëwengæimpa, ante pönëninque quëwëedäni.

<sup>12</sup>Mänömai beyæ minitö, Baonga mönö ñömænguiñö quëwëninque mönö wënæ wënæ cæinënö ante mönö ëñente cædämai ingæimpa, ante nämä wææ aadinque edæ wënæ wënæ mini cæinëwënö ante edæ ëñënamai inte quëwëedäni. <sup>13</sup>Ayæ minitö, Bado, ante edæ, Botö baonca wiwa cæcæcäimpa, ante edæ minitö baö quiomë i inca wënæ wënæ cæquingue ante edæ godö cædämai iedäni. Wæætë do wæwocagaimini inte ñäni ömæmonte miimini quëwëninque minitö wæætë Wængongui ingante nämä godömini æncæcäimpa. Edæ, Botö baö ini edæ tömäo Wængongui quí impä, ante pædæ godöninque miimini quëwëñöminite tömengä wæætë minitö tönö godongämæ cædinque nö pöní cæcæcäimpa. <sup>14</sup>Edæ

Möitee wodi nänö wææ angainö ante ëñëmini incæte wii mäninö beyænque quëwëminipa. Wæætë Wængongui waadete pönö cæcä beyænque quëwëmini inte minitö wënæ wënæ mini cæinëwënö ante ëñente cædämaï inte quëwencæminipa.

**Wīwa mōnō cæinëwënō ante  
mōnō ëñënämaï ingäimpa**

<sup>15</sup>Möitee wodi nänö wææ angainö ante ëñente beyænque wii quëwëmō inte mōnō Wængongui waadete pönö cæcä beyænque quëwëmōmpa. Nāwangä impa. Ìninqe mōnō æbänö cæquii. Wadäni ïñömō idiquibæ ante pönëninque, Wængongui pönö cæcä beyænque në quëwënömō inte mōnō wæætë wënæ wënæ cæcäimpa, ante tedewënanipa. Mōnō ïñömō ædö cæte mänömaïno ante cæquimō.

<sup>16</sup>Wacä ingante në cæte quëwëmini bacæte ante cædinque minitö, Bado, bitö botö awënë badinque edæ ämi ëñente në cæbo baboe, ämini ïninqe edæ mäningä minitö iminite ö ængä ate tömengä beyænque cæte quëwëmaïminipa. Mäninö ante pönëminiyaa. Ayæ adobaï minitö wënæ wënæ cæinente mini wædö ante Ao ante cæmini ïninqe mini wænguinque edæ mäninö beyænque cæte në quëwëmini inte wæbaïminipa. Wæætë Wængongui ingante, Bado, bitö botö Awënë ïnōmi inte edæ ämi ëñente në cæbo baboe, äninque minitö nō cæte mini quëwënguinque tömengä beyænque në cæmini babaïminipa. <sup>17</sup>Minitö doyedë mini wënæ wënæ cæinëwënonque ante cædinque minitö awënë beyænque cæte në quëwëmini bai ingaminipa. Nöwo guiquënë Wængongui nō nänö änö ante odömömōni ëñëninque minitö ïnonque ante edæ në ëñente cæmini baminitapa. Mänömaï baminitapa, ante adinque botö Wængongui ingante waa ate pönëninque apänebopa. <sup>18</sup>Ayæ wënæ wënæ mini cædö beyænque cæte në quëwëmini inte wæyöminite Wængongui ñimpo cæcä ate minitö abæ tawænte ee gote bai

quëwëminipa. Nöwo wæætë tömengä nänö nō cædonque ante ëñente cæmini ïninqe minitö edæ në nō cædongä nempo quëwëninque tömengä beyænque cæte në quëwëmini baminitapa.

<sup>19</sup>Minitö önömïnique inte æiquedö ædæmō ëñenguïminii, ante wædinque botö, Waocä nänö cæi bai impa, ante tædinque odömōmo aedäni. Wëñëñedë wënæ wënæ cædinque godömenque quingämë bai quëwencæte ante minitö, Bado, ante quiomë incæ mini baonga wiwa cæquinque pædæ godö cæminitapa. Mänömaï beyænque ëñënämaï mini cæinëwënö ante ëñente cædinque edæ minitö mäninonque ante në cæte quëwëmini ingaminipa. Nöwo guiquënë tæiyæ wæmō mini ewocate quëwënguinque ante minitö baö ïni edæ, Wængongui qui impa, ante tömäo pædæ godödäni. Ayæ mini nō cæquinque ante edæ tömengä beyænque në cæmini inte quëwëdäni. <sup>20</sup>Wëñëñedë ïñömō minitö wënæ wënæ mini cæinënö beyænque cæte në quëwëmini bai inte wægaminipa. Mänïñedë minitö në nō cædongä nempo quëwënämaï ingaimini inte tömengä nänö angainö ante edæ ëñënämaï ingaminipa. <sup>21</sup>Mänïñedë quingämë bai mini cægainö ante pönente wædinque minitö ñöwo ïñömō guingo imonte baminitapa. Edæ mäninö mini wiwa cægainö beyæ ante dicæ watapæ tote baminiyaa. Ìñæmpa edæ mini wænguinque mänömaï cægaminipa.

<sup>22</sup>Nöwo guiquënë, Wënæ wënæ mini cæinëwënö ante idæwaa ëñencæminipa, ante cædinque Wængongui gä pe æmpote ængä ate minitö abæ tawænte bai Wængongui nempo wæætë ee pongaminipa. Ìninqe në gä pe æmpocä nempo quëwëninque minitö tömengä ingante cæte në quëwëmini inte mini cöwë wänämaï quëwënguinque tæiyæ wæmō ewocamini baminitapa. <sup>23</sup>Mönö waocabo mōnō wënæ wënæ cædö beyæ ante paga cæte bai cædinque Wængongui mōnō imonte pönö pangä wænguënëmō

imompa. Wæætē, Wantæpiyæ  
quēwencæminimpa, ante adocā  
incæ mōnō Awēnē Itota Codito tōnō  
godongāmæ cædinque mōnō imonte  
ōnonque pōnō ængā beyænque mōnō  
cōwē wænāmaī quēwēmompa.

**Ēñente cæquēnēmō inte nā  
cæyænte bai ingamōimpa**

**7** <sup>1</sup>Īñānāni ēñēedāni. Mōitee wodi  
nānō wææ ante yewæmongainō  
ante do adimīni imīni incæte mīnitō  
īmaī ante ēñēmīnyaa. Edæ, Ēñente  
cæedāni, ante tōmengā mīñāni  
quēwēnānique inānite wææ ante  
yewæmongacāimpa. Īninqe waocā  
do wæningā īñongante, Cæe, āñōmō  
tōmengā mīngā ingampa diyæ  
cæquingāā. Edæ dobæ wængāimpa.

<sup>2</sup>Īmaīnō ante pōñēedāni.

Onquiyængā ingante nāñōnāni mongā  
ate tōmengā nānōogængā mīingā  
nānō quēwenganca onquiyængā  
īñōmō tōmengā nānōogængā ingante  
ēñente quēwencæcāimpa, ante wææ  
ante yewæmongatimpa. Wæætē  
edæ tōmengā nānōogængā wængā  
ate onquiyængā owæmpoingā inte  
adocanque quēwēñongante mānōmaīnō  
ante edæ ædō cæte wææ anguiī.

<sup>3</sup>Īninqe nānōogængā ayæ mīingā  
quēwēñongante onquiyængā wacā  
ingante godō guēa mongā adinque, Bitō  
nānōogængā mīingā īñongante bitō wacā  
ingante guēa godō mōmipa tōō, ante  
pīīñānīpa. Incæte tōmengā nānōogængā  
wængā ate abæ tawænte gote bai  
tōmengā adocanque quēwēñongante,  
Wacā ingante mōnāmaī incæbiimpa,  
ante ædō cæte wææ anguiñānīi. Do  
owæmpodingā inte wacā ingante mongā  
adinque tānocā quēwengampa diyæ  
wææ anguiñānīi. Edæ owæmpodingā  
inte tōmengā do mongampa.

<sup>4</sup>Mānōmaī beyæ botō tōniñāmini,  
Mōnō adobai imompa, ante āmo  
ēñēedāni. Nāñōnāni nē mōningā īñōmō  
ēñente cæquēnengā ingā bai mīnitō  
wēēñēñedē adobai Mōitee wodi nānō  
wææ angainō ante ēñente cæquēnēmīni

inte nā cæyænte bai ingamīnimpa.  
Mānōmaī inte wæyōmīnite Codito  
īñōmō, Mīnitō botō nempo quēwēninqe  
waincate bai cæmīni badinque  
Wængongui beyænque ante ēñente  
cæcæmīnimpa, ante pōnō cægacāimpa.  
Tōmengā baonga ponte ēñadinque mōnō  
beyæ wæninqe nāni ōmæmongacāimpa.  
Īninqe mōnō tōmengā tōnō adobai  
wænte bai ingaimō inte mōnō  
wēēñēñedē mōnō ēñenguēnengainō ante  
edæ ædō cæte wæætē ēñenguēnēmō  
inguīmōō. Wæætē edæ nē nāni  
ōmæmongaingā nempo quēwēnōmo inte  
mōnō tōmengā quimō inōmō imompa.

<sup>5</sup>Doyedē īñōmō mōnō nē wæwocamō  
inōmō inte baonque ante pōnente  
mōnō quēwēñedē Mōitee wodi nānō  
wææ angainō ante ēñente wædinque  
godōmenque wiwa cæinēwente wæmō  
batamompa. Īninqe mōnō baaca incate  
bai cædinque mōnō wænguinque wænæ  
wænæ cætamompa. <sup>6</sup>Wēēñēñedē wææ  
ānāni ate mōnō, Ædō cæte ēñente  
cæquiī, ante nā cæyænte bai wægaimō  
inte mōnō edæ Codito tōnō adopoque  
wænte bai nī cæyænte bai bagamōimpa.  
Nōwo guiquēñē adopoque wængaimō  
inte mōnō Mōitee wodi pedæne ante  
nānō wææ ante yewæmongainō ante wīī  
ēñente cæquēnēmō inte abæ tawænte  
bai gomompa. Wæætē edæ Wængongui  
Tæiyæ Waēmō Ōñowoca beyæ quēwēmō  
inōmō inte mōnō tōmengā mīine nānō  
ānonque ante ēñente cæmō imompa.

**Wænæ wænæ botō cædō  
beyæ ante wæbopa, ante**

<sup>7</sup>Īninqe æbānō ante anguīmoo.  
Mōitee wodi, Wænæ wænæ cæquiī,  
ante yewæmongacāimpa, ante botō  
dicæ antawogaa. Ædō cæte edæ  
mānōmaī anguiī. Īñæmpa tōmengā  
wææ ānāmaī ingā bai botō, Quīnō  
wænæ wænæ cæte ī, ante ēñēnāmaī  
incædōmoimpa. Botō edæ, Wacā qui  
æñente wæbo incæte botō ænāmaī  
inte ee abo inte waa cæbopa, ante  
pōnengaboimpa. Mōitee wæætē, “Wacā  
qui ante æñente wædāmaī ie,” ante

wææ angä beyænque botö, Æ äinente botö wædö incæ wænæ wænæ impa, ante tæcæ ëñentabopa. Mäninö ante änämaï ingä bai botö, Wænæ wænæ impa, ante ëñenämaï incädömoimpa. <sup>8</sup>Ïnrique në wænæ wænæ cædömo inte botö Möitee nänö wææ angainö ante önömoncaque ëñente ate botö quingämë bai tömancoo ante godömenque äinente wætabopa. Edæ tömengä wææ änämaï ingä bai mönö wænæ wænæ cædö ïñömö edonque ïnämaï inte edæ dæ ante bai incædönimpa.

<sup>9</sup>Möitee wodi wææ ante nänö yewæmongainö ante botö adämaï imoyedë botö önonque wædämaï quëwengaboimpa. Wæætë, Ïmaï wææ ante yewæmonte ongompa, ante adinque botö, Æ, wænæ wænæ cæbo imopa, ante tæcæ ëñëninque, <sup>10</sup>edæ nänë wænte bai botö, Wæwocabo imopa, ante wætabopa. Edæ, Ïmaï cædinque quëwencæminimpa, ante wææ ante nänö yewæmongainta adinque botö edæ, Botö wænguinque wii ëñente cæbopa, ante tæcæ ëñëninque wætabopa. <sup>11</sup>Edæ Möitee wodi wææ ante nänö yewæmongainta do adimo inte mäninö ante ëñenämaï cædinque botö pante wænguinque wænæ wænæ cætabopa. Edæ, Önonque wænæ wænæ cæte tocäi, ante wapiticæ pönente cæyöмотe tömengä nänö wææ angainö ante odömönäni ëñëmo beyænque botö, Æ, botö wænguinque wænæ wænæ cæbopa, ante wægaboimpa.

<sup>12</sup>Wængongui nänö wææ angainö ïñömö tæiyæ waëmö inepa. Ayæ Möitee wodi adobai mänine tæiyæ waëmö inedö ante apænedinque, Ïmaï cæedäni, ante wææ äninque, Mini waa cæte quëwenguinque ëñente cæcæminimpa, ante nöingä pönï angacäimpa.

<sup>13</sup>Ïnrique tömengä, Mini waa quëwenguinque impa, ante nänö wææ angainö incæ botö imote ædö cæte wænonguii. Wængongui wæætë, Quinö wænæ wænæ cæte i, ante edonque acæminimpa, ante pönö waa cædinque, Minitö ëñenämaï imini beyænque

mini wænguinque impa, ante wææ angacäimpa. Ïnrique Wængongui nänö wææ angainö beyænque botö ïñömö, Wænæ wænæ cægaboimpa, ante edonque atabopa.

<sup>14</sup>Minitö tæiyæ waëmö ëwocacæminimpa, ante Wængongui mönö önöwoca beyænque ante wææ angacäimpa, ante do ëñëmompä. Incæte botö wiwa cædönö beyænque cæte në quëwëmo inte botö edæ ömæwocate bai inte wæbopa. <sup>15</sup>Edæ botö waa cæinente wædö ante cædämaï inte botö wæætë edæ, Wii cæinente awædö, ante botö piinte adö incæ edæ do cæte wæbopa. Ïnrique botö, Æbänö cæboo, ante ëñenämaï imopa. <sup>16</sup>Wængongui nänö wææ angainö ante ëñenämaï cæbo incæte botö ëñenämaï botö cædö ante wii cæinëmopa. Mänömaï botö wii cæinënö beyænque botö, Wængongui waa cædinque wææ angacäimpa, ante bai cædinque tömengä nänö wææ angainö ante edæ Ao ante bai cæbopa. <sup>17</sup>Incæte botö wodi wii tömëmo änö ante cæbopa. Wæætë edæ botö wiwa entawënö beyæ wii cæinente botö wædö ante do ëñente cædinque wæbopa. <sup>18</sup>Edæ ancaa waa cæinente wæbo incæte botö dicæ waa cæbogaa. Mänömaï beyæ botö, Botö baonga quëwëninque botö waa cæquinö ïñömö edæ dæ ampa, ante do ëñëmopa. <sup>19</sup>Waa pönï botö cæinënö incæ cædämaï inte wæbopa. Wæætë edæ wænæ wænæ cæte botö wii cæinente wædö ante ancaa cæte wæbopa. <sup>20</sup>Ïnrique botö wii cæinëmo inte do cæbo ïnrique wii tömëmo cæbopa. Wæætë wiwa cæquinque botö entawënö beyænque edæ wænæ wænæ cæte wæbopa.

<sup>21</sup>Waa cæinente wæbo incæte botö wænæ wænæ cæquinö edæ do entawente wæbopa. Ïnrique botö ñä cæyænte bai imopa, ante do abopa. <sup>22</sup>Edæ botö Wængongui nänö wææ angainö ante mimönë pönëninque watapæ tobopa. <sup>23</sup>Incæte, Wængongui nänö wææ angainö ante botö pönënö incæ ëñenämaï ingäimpa, ante botö



edæ wade wææ ante entawente bai  
 inte wæbopa. Ìninqe nāmā wææ ante  
 bai mīmōnē botō pōnēnō tōnō wade,  
 Ēñēnāmaī ingæimpa, ante wææ ante  
 botō entawēnō tōnō nāēmæ guēadō guēa  
 cæ bai inte wæbopa. Edæ mǎnīne beyæ  
 wīwa botō cæquīnō entawēninqe botō  
 yæguīncamenca ñā cæyænte bai inte  
 wæwēmopa.

<sup>24</sup>Edæ cætawente wænguī wæ. Botō  
 wīwa cæquīnō entawente beyæ botō  
 wænguīñō ēñate wæyōmote æcānō edæ  
 æna beyænque quēwēmaimoo, ante  
 wæbopa. <sup>25</sup>Edæ, Itota Codito beyænque  
 quēwenguīmo ìmopa, ante botō  
 Wængonguī ingante waa ate pōnente  
 apænebopa. Ìninqe Wængonguī nānō  
 wææ angainō ante ēñēninqe botō  
 tōmēmō mīmōno tōmengā beyænque  
 cæte nē quēwēmō ìnōmo ìmopa. Incæte  
 botō ēñayō beyæ botō wīwa cæinēnō  
 beyænque cæte nē quēwēmō inte  
 wæbopa.

**Wængonguī Ònōwoca ingante  
 ewocate quēwengæimpa**

**8** <sup>1</sup>Ìninqe mōnō Itota Codito nempo  
 quēwēninqe mōnō wīwa cæinente  
 wæwēnō ante cædāmaī ìnōmō inte  
 wæætē tōmengā Ònōwoca pōnō angā  
 ēñēninqe cæte quēwēmō adinqe  
 Wængonguī ìñōmō, Mīni wænguīnque,  
 ante apænte ānāmaī ingampa. <sup>2</sup>Edæ  
 wīwa cæinente mōnō wæwēnō ante  
 mōnō wænguīnque ēñente cæyōmonte  
 Itota Codito ìñōmō pōnō gā peyæmpote  
 bai ò angā beyænque mōnō abæ  
 tawænte ee gote bai quēwēmopa. Ayæ  
 tōmengā Ònōwoca nē quēwēnongā nānō  
 wææ ānō ante wæætē mōnō ēñente  
 cæinente quēwēmopa.

<sup>3</sup>Edæ Mōitee wodi, Ìimaī cæedāni,  
 ante wææ āñongā mōnō ìñōmō wīwa  
 cæinente mōnō wæwēnō beyænque aquī  
 pīñænāmaī ēñadōmō inte, Mōnō ædō  
 cæte ēñente cæquīī, ante wægamōimpa.  
 Mōnō waocabo mǎnōmaī wēnæ wēnæ  
 cædōmō inte wæyōmō Wængonguī  
 wæætē, Waocā bacæcāimpa, ante  
 tōmengā Wengā ingante da pōnongā

pōninqe mōnō wīwa cæinentali bai  
 adotai bai ēñate pægacāimpa. Ēñate  
 pædinque tōmengā nāmā baō nānō  
 ēñayō ante edæ, Wængonguī qui impa,  
 ante pædæ godonte bai cædinque  
 wēnæ wēnæ mōnō cædō beyænque  
 ante wængacāimpa. Mǎnōmaī  
 cædinque Wængonguī mōnitō ìmōnite  
 apænedinqe, Mīni wænguīnque  
 mīnitō baonga ēñadinque wēnæ  
 wēnæ cæmīni awædō, ante apænte  
 angacāimpa. <sup>4</sup>Mǎnōmaī pōnō cædinque  
 tōmengā, Wīwa cæinente mīni wæwēnō  
 ante ēñente cædāmaī inte mīnitō  
 ñōwo wæætē botō Ònōwoca ingante  
 ewocadinque tōmengā beyænque  
 quēwēminipa. Ìninqe nō pōnī botō  
 wææ angainō ante tōmānō ante  
 ēñēninqe nō cæte quēwēncæmīnimpa,  
 ante cægacāimpa.

<sup>5</sup>Adopoque ēñadinque baonque  
 nē ēñadāni guiquēnē wīwa cæinente  
 nāni wæwēnō ante pōnente cædānipa.  
 Mempoga ēñadinque Wængonguī  
 Ònōwoca ingante nē ewocadāni  
 guiquēnē tōmengā nānō ānonque ante  
 pōnente cædānipa. <sup>6</sup>Wīwa cæinente  
 nāni wæwēnō ante cæcæte ante nē  
 pōnēwēnāni guiquēnē tōmēnāni  
 nāni wænguīnque mǎnīnō ante  
 pōnēwēnānipa. Wæætē Wængonguī  
 Ònōwoca angā ēñente nē pōnēnāni  
 guiquēnē tōmēnāni nāni gānē entawente  
 quēwenguīnque edæ mǎnōmaī  
 pōnēnānipa. <sup>7</sup>Waadāni wīwa nāni  
 cæinente wæwēnō ante cæcæte ante nē  
 pōnēwēnāni ìñōmō edæ Wængonguī  
 ingante pīinte cædānipa. Wængonguī  
 nānō wææ ānō ante tōmēnāni  
 ònōmoncaque ēñēnāni inte edæ wī  
 ēñente cædānipa. Ìñæmpa tōmengā  
 Ònōwoca ingante ewocadānipa diyæ  
 ēñente cæquīnāni. <sup>8</sup>Wīwa cæinente  
 nāni wæwēnō ante cæcæte ante nē  
 cædāni ìñōmō, Wængonguī waa  
 acæcāimpa, ante ancaa cædāni incæte  
 Wængonguī wæætē edæ waa todāmaī  
 incæcāimpa.

<sup>9</sup>Mīnitō guiquēnē Wængonguī  
 Ònōwoca ingante ewocamīni

īnīnque edæ wīwa cæīnente mīni  
wæwēnīnō ante cædāmaī inte  
quēwēmīni īmaīmīnīpa. Wæætē  
edæ tōmengā Ōnōwoca angā ēñente  
cæte quēwēmaīmīnīpa. Incæte  
waocā æcāmenque incæ Codito  
Ōnōwoca īngante ēwocadāmaī īngā  
īnīnque tōmengā wæætē Codito  
nempo quēwēnāmaī īmaīngampa.

<sup>10</sup>Mīnitō guīquēnē Codito īngante  
entawēmīni īnīnque wēnæ wēnæ  
mīni cægāīnō beyænque mīnitō baō  
īncæ tōmengā tōnō adopoque wænte  
baī ēñamīnīpa. Incæte Codito nānō  
nō cædōnō entawēmīni inte mīnitō  
ōnōwoca mēpoga ēñate baī mīīwoca  
ēwocamīnīpa. <sup>11</sup>Itota īngante Wæmpocā,  
Ñāni ōmæmōe, angā ēñēnīnque ñāni  
ōmæmongacāīmpa. Ayæ mīni baō  
ñōmæīntai ēñayōmīnīte tōmengā  
Ōnōwoca pō guīdīnque quēwengā  
īnīnque Wæmpocā wæætē mīnitō  
īmīnīte, Ñāni ōmæmōe, ante adobaī  
angā ñāni ōmæmoncæmīnīpa. Edæ  
tōmengā Ōnōwoca mīni nē ēwocadongā  
tōnō tōmengā pōnō cæcā ate mīnitō baō  
īncæ ñōmænāmaī īntai bacæīmpa.

<sup>12</sup>īnīnque botō tōñīñamīni ēñēedāni.  
Wængonguī Ōnōwoca angā ate mōnō  
ēñente cæquēnēmō īmōmpa. Wæætē  
wīwa cæīnente mōnō wæwēnō ante wīī  
ēñente cæte quēwenguēnēmō īnōmō  
īmōmpa. <sup>13</sup>īñæmpa wīwa cæīnente mīni  
wæwēnō ante ēñente cæmīni īnīnque  
mīni æmæwo wænguīnque cæbaīmīnīpa.  
Wæætē Wængonguī Ōnōwoca īngante  
ēwocadīnque mīnitō wīwa mīni  
cædīnō ante wīdo cæmīni īnīnque mīni  
quēwenguīnque īmaīmpa.

<sup>14</sup>Ædānidō īnānīte Wængonguī  
Ōnōwoca tōō æmænte angā ate ēñente  
goda īñōmō tōmēnāni īñōmō edæ  
Wængonguī wēñāni īnānīpa. <sup>15</sup>Mīnitō  
guīñente mīni wægāīnō beyænque ñā  
cæyænte baī nē quēwengāīmīni inte  
ñōwo wæætē Wængonguī Ōnōwoca  
īngante ænīnque wīī adobaī guīñente  
wæmīni īmīnīpa. Wæætē Wængonguī  
Ōnōwoca pōnō cæcā beyænque mīnitō  
nāwā wēmīni bamīnīpa. Ayæ tōmengā

Ōnōwoca pōnō cæcā ænte ēwocadīnque  
mōnō guīñēnedāmaī inte edæ, Mæmpo,  
botō Wæmpo, ante apænēmōmpa. <sup>16</sup>Edæ  
mōnō mīmōnē ponte apænēdīnque  
Wængonguī Ōnōwoca incæ, Bitō  
Wængonguī nāwā wēmi īnōmī īmīpa,  
ante apænecampa. <sup>17</sup>īnīnque mōnō  
Wængonguī wēmō īnōmō inte tōmengā  
nānō pōnonguīncoo nē ænguīmō  
īmōmpa. Edæ Codito tōnō āanque baī  
caate wæmō īnīnque mōnō tōmengā ñāō  
baī nānō ēmō baī ñāō adobaī ēmōnīnque  
tōmengā tōnō edæ godongāmæ ænguīmō  
īmaīmōmpa.

#### Ñāō baī mōnō entawenguīmāmo

<sup>18</sup>Botō īīmaī ante pōnēmōpa.  
Ñōwo caate mōnō wæpāmo īñōmō  
pōnōmenque īñonte īīncayæ ate  
ñāō baī mōnō ēmonguīmāmo  
guīquēnē wīī adobaī wædænque inte  
godōmenque nanguī pōnī īngæīmpa.  
<sup>19</sup>Æyedēnō Wængonguī wēñāni  
tæī ēmonte badīnque edonque a  
ongonguīnānīī, ante æcæte ante edæ  
Wængonguī nānō badongaincoo incæ  
nanguī aīnente wædīnque wānō  
conte baī ongoncoopa. <sup>20</sup>Edæ wēnæ  
wēnæ cædāmaī īncoo īñonte mōnō  
waocabo mōnō ēñēnāmaī cægāīnō  
beyæ Wængonguī nānō badongaincoo  
ōnoncooque baī bagatīmpa. Wīī  
nāmā ānō beyæ mānōmaī bagatīmpa.  
Wæætē Wængonguī nē, īīncayæ ate  
watapæ bacæīmpa, ante angaīngā inte  
adocā angā beyænque ōnoncooque baī  
bagatīmpa. <sup>21</sup>Edæ Wængonguī nānō  
badongaincoo ñōmænguīncooque  
inte yæguīncamenca ñā cæyænte  
baī wæyoncoote Wængonguī gā pe  
æmpote baī godō cæcā beyænque  
ñōmænāmaī īnguīncooque bacæcoīmpa.  
Mōnō Wængonguī wēñæmō īñōmonte  
tōmengā pōnō ñīmpo cæcā ate mōnō  
abæ tawænte baī tæī ēmonte bamō baī  
tōmengā nānō badongaincoo adobaī abæ  
tawænte baī mīīncooque bacæcoīmpa.  
<sup>22</sup>Wēñæ nantate, Æīquedō ēñāquīngāā,  
ante nāni wæ baī Wængonguī nānō  
badongaincoo incæ ñōwo ganca

godongämæ nantate bai, Æiquedö waa baquii, ante ö ö wæconcoopa.

<sup>23</sup> Ayæ Wængongui mönō imonte mā pönöninge tömengä Önöwoca ingante pönongä ænte do ewocamö inömö inte mönō adobai, Mönō baö miinö eñauquinque æiquedö Wængongui wēñæmō ædæmō baquii, ante nangui æinente wänö conte ö ö wæmompä.

<sup>24</sup> Edæ Codito, Botö iincayæ ate badömo ate watapæ bacæimpa, ante pönēedäni, äninque mönō imonte edæ ængä beyænque quēwēwompä. İninque mäninö edæ, Watapæ bacæimpa, ante nänö angainö iinömö iinque ba acæte ante mönō ayæ wänö cömompä. Mäninö watapæ do ba amö bai mönō, Ayæ ate watapæ ba acæimpa, ante änämaï incädömöimpa. Waocä do æningä inte, Æinente wæbopa, ante quinante anguingä. İñæmpä edæ dobæ ængantapa. <sup>25</sup> İninque mönō æinente wædö ante mönō cöwæ ængæimpa, ante wede pönēmö iinque mönō wæntædämaï inte ee wänö cömompä.

<sup>26</sup> Ayæ adobai mönō aquiiimö pönö iinömonte Wængongui Önöwoca mönō beyæ cæcampa. Æbänö cæte Wængongui ingante apænequii, ante eñenämaï inte wæyömonte tömengä wiï waomö tededö ante apænedinque tömengä önöwēnenque mönō beyæ apæncampa. Mäninö tömengä nänö tededönö ante mönō guiquēnēnö inte önöneca ædö cæte tedequii. <sup>27</sup> Mönō Wængongui quimö tæiyæ wæmō ewocamö iinömonte Wængongui Önöwoca iinömö mönō beyæ apænedinque, Mæmpo Wængongui nänö angainö bai bacæimpa, ante pönēninque apæncampa. İninque mönō mimöno do adongä inte Mæmpo Wængongui iinömö edæ, Botö Önöwoca æbänö pönēninque apæncä, ante do eñengampa.

**Nē tæi emöninge mönō gänä cæmō imompä, ante**

<sup>28</sup> Wængongui, Botö äno bai iinque bacæimpa ante cæcæminimpa, ante mönō imonte aa pegacäimpa. İninque tömengä nänö äno bai nē cæmō inte

mönö tömengä ingante waadete pönēmö iinömonte Wængongui wæætē mönō beyænque cöwē waa pönö cæcä ate mönō edæ, Inguipoga æbämē ba incæte mönō waa pönö quēwenguinque impä, ante edæ do eñēmompä. <sup>29</sup> Doyedē badöninge Wængongui iinömö, Botö Wengä Bamoncädengä iinongante iinäni tömengä biwiidi badinque nangui inäni yebænte bacædänimpa, angacäimpa. İninque tömengä mänömaï cæcæte ante cædinque, Do botö nē againäni iinömö tömēnänique botö Wengä nänö entawēnö bai adobai entawencædänimpa, ante badongacäimpa. <sup>30</sup> Ayæ, Botö Wengä nänö entawēnö bai entawencæminimpa, ante nänö nē angainäni iinönanite do aa pegacäimpa. Ayæ tömengä nänö aa pegainäni adodäni inänite, Botö ayömo minitö nö cæmini bacæminimpa, ante badongacäimpa. Tömengä ayongä nö cædäni nē bagainäni inänite tömengä, Minitö tæi emonte badinque nänö bai emonte bacæminimpa, ante do badongacäimpa.

<sup>31</sup> İninque æbänö ante anguiimoo. Edæ Wængongui mönō tönö godongämæ cæcä iinongante æcänö mönō imonte bæ taquingä. Edæ dæ angampa.

<sup>32</sup> Tömengä Wengä adocanque iinongante Wængongui pæ gompodämaï inte da pönongä pöninque tömengä wæætē mönō tömämö beyæ teēmente wæætē wængacäimpa. Mäningä ingante da pönöninge Wængongui tömengä nänö ägaincoo ante ædö cæte pönönämaï inguingä. Edæ, Botö Wengä tönö godongämæ entawencæminimpa, ante Wængongui tömancoo do pönongä æmompä. <sup>33</sup> Wængongui mönō imonte apænte ængä ongöñömonte æcänö, Wiwa cæbipa töö, ante apænte anguingä. İñæmpä Wængongui incæ, Botö ayömo minitö edæ nö cæmini iminipa, ante badongä bamöimpa.

<sup>34</sup> Itota Codito nē wængaingä inte godömenque nänö ömæmongaingä inte Wængongui tömëmæ inö do tæ contate a ongongampa. Ayæ mönō beyæ

Wængongui ingante cōwē apænecampa. Tömengä mänōmaī cæcä adinque mönō imonte æcänō, Bitō wænguinquē, ante apænte anguingä. Īñæmpa wīī eyepæ inänipa.

<sup>35</sup>Codito mönō imonte waadete pönente aayongä æcänō gä pe æmpote ö ænguingä. Edæ, Ædō cæte cæquimō, ante wæmō incæ caate wæwēmō incæ mönō imonte togænte pänäni wæmō incæ mänōmaī wæyōmonte mönō Codito dicæ mänīñedē edæ waadedämaī inguingä. Mönō wænguinquē gue ænente wæmō incæ weocoo ömaamō inte wæmō incæ tömengä mönō imonte dicæ waadedämaī inguingä. Quïēmē beyæ, Mīni wænguinquē, ante wææ änäni wæyōmonte yaēmenca tacadäni wæyōmonte Codito mänīñedē dicæ waadedämaī inguingä. <sup>36</sup>Edæ Wængongui ingante ämotamini ante bai yewæmongatimpa.

“Bitō beyænque wænönäni wænguī wæ, ante mönitō tömäā itædē wæmönipa. Obegaīdī inänite, Wænongæimpa, ante änäni bai, mönitō imönite adobai, Wænongæimpa, ante piinäni wæmönipa,”

ante yewæmonte ongō aedäni.

<sup>37</sup>Edæ mänimämo mönō wæpāmo tömämāmo pō ate wædōmō incæte mönō imonte nē waadete pönengä nempo ongöninque mönō tæī ēmonte godōmenque gänä cæte ongōmōmpa. <sup>38</sup>Botō do ēñente pönēmōpa. Mönō nē waadete pönengä nempo ongönōmonte mönō wænguimāmo incæ mönō quëwenguimāmo incæ anquedoidi incæ wænæidi incæ ñowopāmo incæ iīncayæ ponguimāmo incæ tæī nāni piñämāmo incæ mänimāmo tömämāmo ædō cæte mönō imonte gä pe æmpote ö ænguī. <sup>39</sup>Ayæ edæ æibæ mönō æite wæquimāmo incæ guibæ mönō wæænte wæquimāmo incæ quïēmē Wængongui nänō badongaīmāmo incæ mänimāmo tömämāmo iñōmō mönō Codito nempo ongönōmonte ædō cæte gä pe æmpote

ö ænguī. Edæ Wængongui nänō waadete pönēnō entawēninque mönō Awēnē Itota Codito iñōmō mönō imonte waadete pönēninque pæ gompoyongante mänimāmo tömämāmo incæ gä pe æmpote ö ænāmaī ingæimpa. Ämo ēñēmaīmīnipa.

**Idægoidi inänite Wængongui apænte angacäimpa, ante**

**9** <sup>1</sup>Botō iñōmō edæ mīmō entawēmo inte nāmā apænte pönēñōmote Wængongui Tæiyæ Waēmō Önōwoca adoyōmō ante apænecä ininque botō ædō cæte babæ wapiticæ anguimoo. Edæ Codito nempo quëwēnōmo inte botō nō pōni apænedinque iīmaī ämōpa. <sup>2</sup>Mīmōno cōwē cæwēnente wæwēmo inte botō iīmaī ante pönēninque nanguī wæbōpa. <sup>3</sup>Botō guidēnāni botō tönō adodäni inönäni iñönänite Wængongui ængä beyænque quëwencädänimpa, ante botō nanguī äninque wæbōpa. Īninque Wængongui tömēnāni inänite, Quëwencæmīnimpa, ante æninque wæætē botō Codito nempo quëwēñōmote botō imote piīninque tatodonte wido cæcä bai botō Ao ante piyænē cæcædōmoimpa.

<sup>4</sup>Tömēnāni iñōmō idægoidi inänipa. Wængongui pæpogacä pædäni ininque tömēnānique tömengä wēnāni ingadänimpa. Tömēnāni inänite Wængongui ñäo entawente nänō tæī ēmōnō ante odōmongä adinque tömēnānique nē agaiñāni inänipa. Tömēnāni inänite apænedinque Wængongui, Botō pönō cæbo ate mīnitō Ao ämini ininque mönō godongämæ waa cæcæimpa, ante cægacäimpa. Īmaī cæedäni, ante tömengä tömēnāni inänite täno wææ angä ēñente mäninō nänō wææ angaiñō ante tömēnānique nē mangaiñāni inänipa. Wængongui oncönē ñænæcönē wadäni guidämaī iñönänite idægoidique guite tömengä ingante waa ate ædæ wæænte apænedänipa. Tömēnānique inänite Wængongui, Cōwē waa cæcæboimpa, ante mä apænecacäimpa. <sup>5</sup>Mönitō,

Mæmæidi, ante möni nē angaināni incæ idægoidi mæmæidi adodāni inānipa. Īninqe tōmēnāni Pæingā badinque mönō Codito inguipoga ēñagacāimpa. Tōmengā ĩñōmō tōmāmō Wængonguī ĩnongā ingampa, ante adinque mönō tōmengā ingante apænedinque, Tōmēmi toquinque pōnō waa cæbi æmōnīpa, ante mönō cōwē ñimpo cædāmai apænecæimpa. Mänōmai ĩmpa, ante botō, Amēē, āmopa.

<sup>6</sup>Idægoidi quēwencædānimpa, ante nānō angainō bai Wængonguī cædāmai ingacāimpa, ante botō dicæ āmogaa. Wæætē edæ ĩimai ĩmpa. Nāwā idægoidi nāni wede pōnēnō bai pancadāniya pōnēnāmai ĩnāni ĩñōnānite botō tōmēnāni ĩnānite, Nāwā idægoidi ĩnānipa, ante apænedāmai ĩmopa. <sup>7</sup>Edæ Abadāo wodi pæināni incæ pancadāniya ĩñōmō, Abadāo wodi wēnāni, mönō ānōnāni wīi ĩnānipa. Wæætē, “Botō ayōmo Itæca wēnānique bitō pæināni inguināni ĩnānipa,” ante mæmæ Abadāo ingante Wængonguī angampa, ante yewæmongatimpa. <sup>8</sup>Mänōmai ĩ ĩninqe Abadāo tapæicā nē ēñate pædāni ĩnānite Wængonguī, Abadāo wēnāni, ante angantawogaa. Wæætē Abadāo wodi ingante apænedinque, Bitō wēnāni bacædānimpa, ante Wængonguī nānō nē angaināni guiquēnē tōmēnānique tōmengā wēnāni ĩnānipa. <sup>9</sup>Edæ, “Īñedē ĩmpa, ante botō ānōñedē botō adodō pōmo ate māniñedē ate edæ Tada incæ wēñængā onguīñængā ingante mancæcāimpa,” āninqe Wængonguī, Mäninō botō ānō bai cōwē cæcæboimpa, angacāimpa.

<sup>10</sup>Wīi māninqe ĩmpa, ante ēñengæimpa. Godōmenque ĩimai ante mönō pōnengæimpa. Wæmpocā adocanque tapæicā ate Adebeka wodi wēna āncadēnaque ēñagadāimpa. Mänina wæmpocā ĩñōmō mönō wæmæ Itæca wodi ingacāimpa. <sup>11</sup>Tōmēnā wēna ayæ ēñadāmai ĩñedē ædō cæte wēnæ wēnæ cæquīnaa, ædō cæte waa cæquīnaa. Incæte edæ Wængonguī, Īngā ingante apænte æncæboimpa, ante

nānō angainō ante cōwē bacæimpa, ante cædinque, <sup>12</sup>tōmēna ayæ cædāmai ĩñōnate Wængonguī nē aa pedongā inte, “Bamoncadengā incæ ayæmengā ingante nē cæcā incæcāimpa,” ante Adebeka wodi ingante apænegacāimpa. <sup>13</sup>Adobainō ante Wængonguī beyæ yewæmongadānimpa. “Aacobo ingante waadete pōnengaboimpa. Etawoo ingante guiquēnē piinte agaboimpa,” ante yewæmongatimpa.

<sup>14</sup>Īninqe mönō æbānō anguīi. Wængonguī dicæ nō cædāmai ingantawogaa. <sup>15</sup>Wæætē Mōitee wodi ingante apænedinque Wængonguī ĩimai angacāimpa. “Waocā adocanque ingante botō, Wīi pāinēwædō, āninqe tōmengā ingante do godō ñimpo cædinque pānāmai incæboimpa. Adocanque ingante nē waadete cæinēmo inte botō tōmengā ingante do godō waadete waa cæcæboimpa,” angacāimpa, ante yewæmongatimpa. <sup>16</sup>Īninqe waocā nanguī cæinengā incæte waocā nanguī cæcā incæte Wængonguī wīi waocā nānō cædō beyænque apænte ængampa. Wæætē nāmā nānō waadete waa cæinēnō beyænque Wængonguī waocā ingante godō apænte ængampa. <sup>17</sup>Edæ awēnē Padaönō wodi ingante apænedinque Wængonguī, “Botō ĩimai ante cæcæte ante bitō ĩmite ængō cætābopa. Edæ bitō ĩmite ængō cædinque tæi piñante pōnō cæbo adinque waodāni, Wængonguī tæi piñængā inte mānōmai cæcampa, ante botō emōwo ante inguipoga tōmāo apænedāni do ēñencædānimpa, ante cætābopa.” Wængonguī mānōmainō ante Padaönō ingante apænecantapa, ante yewæmongatimpa. <sup>18</sup>Īninqe Wængonguī, Adocanque ingante godō waadete ñimpo cæcæboimpa, āninqe tōmengā ingante do godō waadete ñimpo cæcampa. Wæætē wacā ingante guiquēnē, Godō cæbo ate mīmō omædengā bacæcāimpa, āninqe Wængonguī tōmengā ingante do cæcā ate edæ mīmō omædengā bate wæcampa.

<sup>19</sup>Mänömainö ante yewæmōmo adinque bitō wabānō iīmaī anguīmi, ante awædō. “Iñæmpa mōnitō Wængonguī nānō änō ante Baa änāmaī iñōmōnite tōmengä, Mīnitō beyænque impa, ante quīnante pīinte angää.” Mänömainö ante ämitawoo. <sup>20</sup>Bitō iñæmpa önōmique iñōmi inte Wængonguī ingante wæatedō wæætē ämii. Nē badongä ingante tōmengä nānō nē badōnca incæ dicæ, “Botō imote quīnante mänōmaī badōwēmii,” ante dicæ anguīi. <sup>21</sup>Nē bædongä iñōmō daibo pancaiya æninque waa pōni wamoncade bædinque ado daibo pancaiya æninque önönque ewenguincade bæyongante æcānō nē bædingä ingante Baa anguingää. Nē bædongä iñōmō nē änogä inte bæcampa. Edæ Baa anguīmii.

<sup>22</sup>Wængonguī nānō nē pīināni iñōmō tōmēnāni nāni ömæe ewente wæquinque wiwa cæyōnānite tōmengä piyænē cædinque wantæpiyæ pānāmaī inte ee ongongantawo. Iñæmpa tōmengä nānō pīimāmo ante adinque do wæcædānimpa, ante cædinque ayæ tōmengä nānō tæi pīñæmāmo ante edonque acædānimpa, ante cædinque Wængonguī mänōmaī ee ongongä apa änewēē. <sup>23</sup>Ayæ wæætē, Botō waadete godō waa cæbo ænāni inte edæ tōmēnāni iñōmō botō ñāo bai botō emōnō ante acædānimpa, ante cædinque Wængonguī mänōmaī pānāmaī inte edæ ee cæcampa. Wæætē, Tōmēnāni ñāo iñōmō quēwencædānimpa, ante tōmengä godō badongä ate tōmēnāni ñāo bai emōnānipa. <sup>24</sup>Edæ mōni oodeocabo iñōmōnite mīnitō oodeomīni ināmaī iñōmīnite Wængonguī mōnō tōmāmō imonte mänōmaī cæcæte ante aa pegacāimpa. <sup>25</sup>Wængonguī iīmaī angampa, ante Ootea wodi yewæmongacāimpa.

“Botō guidēnāni ināmaī iñōnānite botō wæætē,  
Botō guidēmīni, ante  
apænecæboimpa.

Onquiyængä botō nē waadedāmaī ingaingä iñongante botō wæætē,

Botō nē waadebi imipa,  
ancæboimpa.

<sup>26</sup>Ayæ, ‘Botō guidēmīni ināmaī imīnipa,’ ante botō ongonte äñōmō adoyōmō ongōninque botō wæætē edæ, ‘Botō Wængonguīmo nē Quēwēmo wēmīni imīnipa,’ ancæboimpa.”

Ante adocā Wængonguī nānō änō ante yewæmongacāimpa. <sup>27</sup>Idægoidi inānitedō ante yedæ äninque Itaiya wodi iīmaī apænecacāimpa. “Gāwapæ wedeca emōnacoo nanguī pōni öñō bai idægoidi adopodāni nanguī pōni ināni incæte pancadāniya guiyä wæantodōni bai mänimpodānique quēwencædānimpa. <sup>28</sup>Edæ Wængonguī, Inguipoga quēwēnāni inānite apænte äninque botō angāinō bai do edæ cæcæboimpa, ante nē apænegaingä inte tōmengä adocā, Idæwaa, ante quingæ pōni edæ iinque cæcæcāimpa,” ante Itaiya wodi yewæmongacāimpa. <sup>29</sup>Adocā Itaiya wēēnē iīmaīnō ante nānō apænegaīnō bai impa.

“Mōnō Awēnē nē Tæiyæ Awēnē tæi pīñænogä inte dodāni inānite, Mīnitō pæināni yebænte nanguī ināni bacædānimpa, ante cædinque pancadāniya inānite ata cæpocā quēwengadānimpa. Mänōmaī ante cædāmaī ingä bai, mōnō wæætē Todōmä quēwengāināni bai dæ badinque Gömoda nāni quēwēñōmō dæ ba bai mōnō adobaī edæ dæ bacædōmōimpa,” ante nānō angāinō bai impa.

**Idægoidi adobaī pōnēninque  
quēwenguēnēnāni inānipa**

<sup>30</sup>Iñinque æbānō ante anguīi. Oodeo ināmaī ināni guiquēnē, Nō entawēmōni bacæmōnimpa, ante änāmaī ingadānimpa. Incæte Wængonguī godō cæcā beyænque tōmēnāni wede pōnēninque wede nāni pōnēnō beyænque Wængonguī ayongä nō entawēnāni do badānipa. <sup>31</sup>Idægoidi guiquēnē, Nō cædāni, ante mōni wææ

angainō beyænque nō entawēmōni bacæminimpa, ante nē angaināni inte eyepæ cædāmai inānīpa. <sup>32</sup>Quinante eyepæ cædāmai inānīi. Tömēnāni wede pōnēnāmai ināni inte wæætē edæ, Mōnō nanguī cædinque nō cæmōni bacæmōnīmpa, ānīnque oda cæte nāni pōnēnō beyænque dicaboga tee tēwate bai cædinque eyepæ cædāmai ingadānīmpa. <sup>33</sup>Edæ do Wængonguī beyæ yewæmongatīmpa.

“Aquēnē quēwēnānīi. Botō Codito ingante Tiōno nāni quēwēnōmō dica bai gō cæbo gongængā adīnque edæ

waođāni dicaboga tee tēwate bai pōnēnāmai ināni inte tæ go wææncædānīmpa.

Tömēngā adocā ingante nē pōnēngā guiquēnē cōwē edæ guingo imōnāmai inte quēwēncæcāīmpa,”

ante yewæmongatīmpa.

**10** <sup>1</sup>Botō tōniñamīni ēñēedāni. Idægoidi quēwēncædānīmpa, ante botō mīmōnē nanguī aīnente wædinque Wængonguī ingante apānedīnque botō, Bitō æmi beyænque quēwēncædānīmpa, ante cōwē apānebopa. <sup>2</sup>Wængonguī beyæ nō cæcæīmpa, ante cæīnente wæđānīpa, ante nāwangā īmpa. Incæte tōmēnāni, Wængonguī beyæ nō cæcæte ante æbānō cæquīi, ante ēñēnāmai ināni inte ōnonque cæte wæđānīpa. Botō, Mānōmai īmpa, ante nē apānebo inōmo īmpa. <sup>3</sup>Edæ Wængonguī pōnō badongā ate mōnō tōmēngā ayongā nō entawēmō bamōmpa, ante ēñēnāmai ināni inte idægoidi iñōmō, Nāmā mōnō cædō beyænque nō cæmō bacæīmpa, ante cædinque edæ oda cægadānīmpa. Mānōmai cædinque tōmēnāni Wængonguī nānō nō cægainō ante edæ Baa angadānīmpa. <sup>4</sup>Nō cæmō bacæte ante Wængonguī nānō wææ angainō ante ēñente cæquēnēmō inte mōnō tōmāmō wīi eyepæ inte wægāmōīmpa. Mānōmai inte wæyōmonte Codito iñōmō, Mīni pōnēncabo Wængonguī ayongā nō entawēmīni bacæminīmpa, ante

cædinque mānīnō Wængonguī nānō wææ angainō ante tōmānō ante iīnque cægacāīmpa. Iīnque tōmēngā mānōmai iīnque cæcā adīnque Wængonguī mōnō imonte wæætē wææ ānāmai ingampa.

<sup>5</sup>Iīmai cæedāni, ante botō wææ angainō ēñente cædinque nō cæđāni badānīpa, ante Mōitee wodi iīmai ante yewæmongacāīmpa. “Nē ēñente cæcā iñōmō tōmēngā nānō ēñente cædō beyænque quēwēncæcāīmpa,” ante yewæmongacāīmpa. <sup>6</sup>Wæætē, Mōnō wede pōnēncabo æbānō cæte Wængonguī ayongā nō entawēmō imōo, ante iīmai ante adocā yewæmongacāīmpa. “Bitō, ‘Æcānō ōönædē æi āñete wæænguingāā,’ ante nāmāneque ānāmai iē.” Mānōmai ante tōmēngā, Codito ingante æi āñete wææncæte ante mōnō pōnēnāmai ingæīmpa, ante ancæte ante yewæmongacāīmpa. Iñæmpa Codito pōnāmai ingampa diyæ æite māwæmi wæænguingāā. Dobæ edæ inguīpoga pongacāīmpa. <sup>7</sup>“Ayæ, ‘Æcānō tadōmengadæ wæi āñete ænguingāā,’ ante ānāmai iē.” Iñæmpa Codito ayæ ōñongampa diyæ wæite mæmi æænguingāā. Edæ Codito dobæ nāni ōmæmonte quēwēngampa.

<sup>8</sup>Iīnque, Mōnō wede pōnēncabo æbānō nō cæmō bamōo, ante æbānō ante yewæmongacāi. Edæ, Wede pōnēngæīmpa, ante mōnitō apānemōni mīni ēñēnīne ante adode ante iīmai ante yewæmongacāīmpa. “Wængonguī nānō nō ānōne iñōmō edæ bitō weca eyequēi pōnī ēnepa. Edæ bitō ōnōne tedeyōmi bitō mīmōno pōnēñōmi tōmēngā nānō nō ānōne edæ adoyōmō pōnī ēnepa.” <sup>9</sup>Æbānō cæte quēwēnguiī, ante iīmai ante ēnepa. Itota Codito Tæiyæ Awēnē inongā ingampa, ante bitō ōnōneca apānedīnque, Itota Codito wæante ōñōñongante Wængonguī angā nāni ōmæmongacāīmpa, ante bitō mīmōno pōnēmi adīnque tōmēngā ængā beyænque quēwēncæbiīmpa, ante adode incæ ēnepa. <sup>10</sup>Mīmōno edæ wede pōnēnīnque mōnō Wængonguī ayongā

nō entawēmō bamompa. Mānōmaīnō ante wede pōnēmopa, ante ōnōneca apāneyōmonte tōmengā ængā beyænque mōnō quēwēmompa.

<sup>11</sup>Codito ingantedō ante apānedinque, “Tōmengā ingante nē wede pōngengā iñōmō tōmengā edæ guingo imōnāmaī incæcāimpa,” ante Wængonguī angā ēñente yewæmongadānimpa. <sup>12</sup>Edæ mōnitō oodeomōni iñōmōnite mīnitō wæætē oodeomīni ināmaī iñōmīnite mōnō tōmāmō imonte adinque mōnō Awēnē iñōmō edæ, Adoyōmō pōnī imīnīpa, ante acampa. Ininque tōmengā adocā tōmāmō Awēnē inongā ingampa. Ayæ tōmengā ingante aa pemō ēñēninque tōmengā iñōmō edæ tōmāmō imonte nanguī pōnī pōnō cæcā æmompā.

<sup>13</sup>Iīmaī ante Wængonguī beyæ ante yewæmongatimpa. “Mōnō Awēnē ēmōwo ante apānedinque aa pedāni ēñēninque mōnō Awēnē iñōmō edæ tōmēnāni tōmānāni inānite ængā beyænque quēwencædānimpa.” <sup>14</sup>Ininque tōmengā ingante nē pōnēnāmaī ināni iñōmō ædō cæte tōmengā ingante aa pequīnānīi. Ayæ tōmengā ēmōwo ante ēñēnāmaī ināni iñōmō tōmengā ingante ædō cæte pōnenguīnānīi. Ayæ tōmengā ēmōwo ante wadāni gote apānedāmaī iñōnāni tōmēnāni ædō cæte ēñenguīnānīi.

<sup>15</sup>Ayæ edæ wadāni da godōnāmaī iñōnāni nē apānequēnēnāni wæætē ædō cæte gote apānequīnānīi. Iīmaīnō ante edæ Wængonguī beyæ ante yewæmongatimpa. “Tōmengā waa pōnī nānō cægaiñō ante nē watapæ apānedāni iñōmō tōmēnāni nāni apānecæ gote cægōniwa iñōmō edæ waa pōnī ēwadānīpa,” ante nāni yewæmonte angaiñō baī impa. Edæ nē apānecæ godāni inānite Wængonguī waa acampa.

<sup>16</sup>Mōnō Awēnē ingantedō ante watapæ apānedāni ēñēninque idægoidi pancadāniya Ao angadānimpa. Pancadāniya guiquēnē Baa angadānimpa. Tōmēnāni mānōmaīnō nāni cædinō ante Itaiya wodi iīmaī ante yewæmongacāimpa. “Awēnē Wængonguī ēñēmi. Mōnitō apānemōni

tōmēnāni nāni ēñēnō ante edæ æcānō ēñente pōngengā. Iñæmpa nē pōngengā iñōmō edæ dæ angā awædō,” ante yewæmongacāimpa. <sup>17</sup>Ininque gode ānāni ate nē ēñēnānique wede pōnēnāni badānīpa. Ayæ Codito nānō ānōnō ante gode ante apānedāni beyænque nē ēñēnāni badānīpa. <sup>18</sup>Ininque botō, Mānīnō ante idægoidi gobæ ongōnānīpa diyæ ēñēnāmaī inguinānīi, āmopa. Do ēñēnānitapa, ante edæ iīmaī ante Wængonguī beyæ yewæmongatimpa.

“Nē apānedāni inguipoga tōmāo gote tededāni ēñēnānīpa.

Waadāni inguipoga nāni quēwenganca quēwēñōnānite mānīnō tōmēnāni nāni apānedō ante do ēñēnānīpa,” ante yewæmongatimpa.

<sup>19</sup>Ayæ wæætē, Idægoidi ōnōmonca ēñēninque ōmæcadāni inānīpa diyæ ēñēnāmaī inguinānīi. Do ēñēnānitapa. Edæ Mōitee wodi incæ iīmaī ante yewæmongacāimpa.

“Wadāni ōnōnānique iñōnānite botō godō waa cæbo adinque mīni idægocabo wæætē, Mōnitō imōnite wīi pōnō cæbīi, ante piīnte wæcæmīnīpa.

Ayæ wadāni ocāi ōmæcadāni iñōnānite

botō godō waa cæbo adinque mīnitō wæætē nē piīnte amīni bacæmīnīpa,”

Ante cæcæte ante Wængonguī pōnō cægacāimpa. <sup>20</sup>Itaiya wodi guiquēnē Wængonguī beyæ ante guīñēnāmaī inte apānegacāimpa.

“Wadāni iñōmō botō imote ante diqui diqui mināmaī ināni incæte do adānitapa.

Ayæ, Wængonguī ingante aīnēmōnīpa, ante ānāmaī iñōnānite, Botō imote aedāni, ante botō odōmōmo adānitapa.”

<sup>21</sup>Āninque Itaiya wodi idægoidi inānitedō ante apānedinque, “Ēñēnāmaī inte Baa ānōnāni iñōnānite botō, Pōedāni, ante tōmāā itædē ōnmpo compo compo cæbo incæte pōnāmaī inānitapa.”



**Idægoidi pancadäniya inänite  
Wængonguï apænte ængä**

**11** <sup>1</sup>Inique botö iïmaï ante apænebopa. Tömengä quïnäni iñönänite Wængonguï dicæ idægoidi inänite Baa angantawogaa. Iñæmpa botö adobo näwä idægobo ïmopa. Abadaö wodi pæïmo inömo inte botö edæ Beencaminö wodi pæïmo inömo inte tömengä pæïnäni tönö adocabobo tömömo inömo ïmopa. <sup>2</sup>Idægoidi botö quïnäni incädänimpa, äninque Wængonguï wëñëñedë pönï mönitö imönite adinque do apænte ængacäimpa. Iñinque mönitö tömengä nänö në agaimöni iñömönite tömengä cöwë Baa änämaï ingacäimpa. Idægoidi inänite piïnte äninque Ediya wodi Wængonguï ingante apænegacäimpa, ante æbänö yewæmonte ongompa, ante minitö adämaï iminitawo.

<sup>3</sup>“Awënë ëñëmi. Bitö beyä në apænedäni inänite wænöninque idægoidi godömenque cædinque, Wængonguï quï, ante näni iya täinca bæ tadinque edæ wido cædänitapa. Ayæ botö adoboque inte edæ ayæ quëwëñömote botö imote wænoncæte ante cædäni wæbo abi.”

<sup>4</sup>Äñongante Wængonguï, “Iñæmpa botö tiæte müido ganca mänimpodäni inänite, Botö quïnäni inänipa, ante wææ gompobo quëwënëni apa quëwëe. Wadäni näni, Mönitö wængonguï Baado ingampa, näni änogä weca botö quïnäni iñömö edæ da guicapodämaï inänipa cæbii,” angacäimpa, ante näni yewæmongainta adämaï iminitawoo.

<sup>5</sup>Nöwo iñömö edæ adobaï impa. Idægomöni möni cabo incæ mäa pönï imöni inte Wængonguï ingante Baa änämaï iñömönite tömengä mönitö imönite waadete pönö cædinque, Botö quïmïni imïnipa, ante apænte ængampa.

<sup>6</sup>Iñinque, Wængonguï waadete pönö cædinque apænte ængampa, ante adinque tömëmonque waa cæmö beyä ædö cæte Wængonguï apænte ænguingää. Iñæmpa tömëmonque waa cæmö beyä Wængonguï mönö

imonte apænte ængä bai, Wængonguï waadete pönö cæcampa, ante ædö cæte anguënë i. Wæætë edæ tömëmonque waa cæmö beyä Wængonguï apænte ængä bai tömengä adocä ædö cæte nänö waadete pönö cædö beyænque mönö imonte apænte ænguënegää. Iñæmpa Wængonguï waadete pönö cædinque apænte ængä ininque, Tömëmonque waa cæmompa, ante ædö cæte anguïï.

<sup>7</sup>Mänömaï i ininque æbänö ante anguïï. Edæ idægoidi tömënäni näni nanguï æinënö ante diqui diqui minte ænämaï iñönäni mönö iñömö Wængonguï nänö në apænte ængaimö imö iñömö edæ do æntamompa. Në ænämaï inäni inänite Wængonguï ee ayongante mïmö ömædënnäni bagadänimpa. <sup>8</sup>Iïmaï ante Wængonguï beyä näni yewæmongainö bai ingatimpa. “Tömënäni inänite Wængonguï godö cæcä ate möwo möinente bai wädäni inte tömënäni awinca ëmönäni incæ nöwo ganca adämaï inte wädänipa. Önömonca ëmoncadäni incæ edæ ëñënëmaï inte wädänipa,” ante yewæmongatimpa. <sup>9</sup>Ayæ awënë odeye Dabii wodi Wængonguï ingante apænedinque iïmaïnö ante apænegacäimpa.

“Wængonguï ëñëmi. Waodäni näni wænguinque gote äæmäæ bedäni bai cædinque iïnäni iñömö edæ wapiticæ näni towënönö ante gote towënanipa. Incæte bitö godö cæbi ate tömënäni näni towënö beyä edæ wæncädänimpa, ämopa.

Tömënäni tee tëwate bai oda cæte wæyönäni bitö godö pämi wæcädänimpa, ämopa.

<sup>10</sup>Bitö godö cæbi ate tömënäni awinca edæ mäë mämönte bai bamöninque adämaï incädänimpa.

Ayæ teëmë mongæninque bocæ ñongænte cöwë wæcädänimpa, ämopa,”

ante awënë Dabii wodi Wængonguï ingante apænegacäimpa.

**Idægoidi ināmai ināni  
quēwēnānīpa, ante**

<sup>11</sup> Ñowo wæætē iīmai āmopa. Do oda cædāni incæ idægoidi iñōmō dicæ æmæwo tæ go wæænguīnāni inānitawogaa. Ināmpa ayæ ate ængæ gantidīnque tōmēnāni nē quēwenguīnāni inānīpa. Incæte Wængonguī, Tōmēnāni ēñēnāmai cædāni beyæ wadāni quēwēnāni adīnque idægoidi wæætē, Mōnō quēwengade impa, ante piīnte wæcædānīpa, ante godō cæcā ate idægoidi edæ oda cægadānīpa.

<sup>12</sup> Inīnque idægoidi ēñēnāmai cædinque ænāmai ināni beyæ mōnō inguīpoga tōmāmæ mōnō quēwencabo wæætē edæ nanguī pōnī æmōmpa. Tōmēnāni ænāmai inte omæpodāni wædāni beyænque mīnitō idægomīni ināmai imīni wæætē nanguī pōnī æmīnīpa. Inīnque idægoidi nāni quēwenguīmāmo iīncayæ ate eyepæ pōnī ænāni ate edæ æbānō baquīī. Edæ idægoidi iīncayæ ate eyepæ pōnī ænte entawēnāni beyænque mōnō waocabo tōmāmō godōmenque nanguī pōnī ænte entawengæimpa.

<sup>13</sup> Idægomīni ināmai imīni imīnite apænebo ēñēdāni. Botō imote Codito, Idægoidi ināmai ināni inānite apænecebiimpa, ante da godongā gotabopa. Inīnque botō, Mīnitō imīnite nē apænebo inte tobopa, ante nanguī tedebo. <sup>14</sup> Edæ, Idægoidi ināmai ināni incæ do quēwēnānīpa, ante botō tedebo ēñente wædinque botō guīdēnāni idægoidi wæætē, Mōnitō adobaī quēwencæmōnīpa, ante piīnte wæcædānīpa, ante tedebo. Ayæ adodāni pancadāniya godōmenque pōnēnīnque quēwencædānīpa, ante cædinque botō edæ nanguī tedebo.

<sup>15</sup> Idægoidi inānite Baa ante wido cædinque Wængonguī wæætē inguīpoga tōmāmæ quēwēmō iñōmonte piyānē cædinque edæ waadete pōnō cægacāimpa. Inīnque tōmengā iīncayæ ate idægoidi inānite Ao ante ængā ate edæ æbānō baquīī. Mānīfēdē ate edæ mōnō wænte ofionte bai inōmō inte edæ

mōnō nāni omæmonte quēwengæimpa. <sup>16</sup> Iīmai ante pōnengæimpa. Pāo pancaboga pancæte bai wædænque ināni inte tāno nāni pōnente quēwencabo iñōmō tæiyæ waēmō ināni inīnque iīncayæ nāni pōnente quēwencabo guīquēnē pāo babo bai adobaī ināni inte tōmēnāni adobaī tæiyæ waēmō inānīpa, ante pōnengæimpa. Tāno pōnengaināni guīquēnē tæcæguinto bai inōnāni inte tæiyæ waēmō ināni inīnque edæ iīncayæ pōnēnāni guīquēnē yæpænto bai inōnāni inte adobaī tæiyæ waēmō inānīpa.

<sup>17</sup> Odibowæ ononque pæwæ incæ wainca incacæimpa, ante cædinque waocā tōmengā nānō mingaiwæ waa pōnī incawæ adīnque yæpængō nāmænte godō ononque pæwæ yæpæntoga mīne tīmongā amīnīpa. Idægoidi iñōmō waocā nānō mīnte pæwæ bai iñōnānite Wængonguī pancadāniya inānite yæpængō wæi nāmænte bai wido cæcā wædānīpa. Tōmēnāni mānōmai wæyōnāni bitō guīquēnē ononque pæwæ yæpængō bai imītapa. Incæte Wængonguī, Odibowæ yæpængoncoo bai tæcæguinto beyænque odæ yate bai pæte incacæimpa, ante odibowāa yæpæntoga godō mīni tinte bai cædinque bitō imite waadete pōnō cæcā ate bitō idægoidi beyænque mīīmi inte ongōmīpa. <sup>18</sup> Mānōmai ī inīnque bitō wæætē edæ, Wængonguī botō imote pōnō cæcæte ante tōmēnāni inānite wido cæcampa, ante bitō nāmā ængō cæcæte ante cædinque idægoidi inānite ante wīī piīnte ancæbiimpa. Ināmpa tæcæguinto ēwa bai ināni inte idægoidi iñōmō edæ bitō beyæ dicæ quēwēnāniya. Wæætē edæ tæcæguinto ēwa bai ināni beyænque bitō quēwēmīpa, ante apænebo ēñēnīnque bitō piīmi inīnque, Mānōmai impa, ante tāno pōnēe.

<sup>19</sup> Inīnque bitō, “Oda yacæimpa, ante cædinque godō mīne tīmōnāni bai Wængonguī botō imote pōnō cæcæte ante cædinque idægoidi inānite wæætē wido cæcampa,” ante pōnēmitawoo. <sup>20</sup> Bitō pōnēnō edæ nāwangā impa.

Incæte edæ tömënäni nāni pönënāmai inō beyænque Wængongui tömënäni inānite wido cægacäimpa. Bitō guiquënë wede bitō pönënō beyænque miimi inte ongömipa. Inique bitō guiñente wædinque edæ nāmā ængö cædāmai inte edæ, Botō waëmō imo beyæ cæcantapa, ante pönënāmai imāwe. <sup>21</sup> Ināmpa nāwā yæpængö bai ināni inānite Wængongui tapodāmai inongā inte bitō önömique iñömite dicæ ata cæpoquingā.

<sup>22</sup> Inique, Wængongui nē waadete cædongā incæ cöwē nē apænte pangā ingampa, ante pönēe. Tömengā iñömō nē oda cædāni inānite pangampa. Wæætē bitō nē waadete cædongā nempo quëwēmi inique tömengā bitō imite waadete cæbaingampa. Incæte tömengā nempo wi quëwēmi inique tömengā wæætē bitō imite edæ wæi ñæmænte bai wido cæbaingampa. <sup>23</sup> Idægoidi guiquënë, Idæwaa pönënāmai inte awædō, ante ocæ emænte pönāni adinque Wængongui nē tæi piñænongā inte tömënäni inānite wæætē ado awæ yæpæntoga godō mini timonte bai pönō cæcā ate miñāni edæ ongömainānipa. <sup>24</sup> Waodāni waa incawæ yæpængö nāmænte ononque pæwæ yæpæntoga godō nāni mine timönō bai Wængongui wi adobai cæcampa. Wæætē edæ bitō ononque pædiwæ yæpængö bai iñömite tömengā waadete pönō nāmænte bai cædinque, Nāwā idægobi babipa, ante waa pæwæ yæpæntoga godō mini timonte bai cæcampa. Bitō imite mænōmai waa cæcā inongā inte tömengā idægoidi inānite æbānō godömenque waa cæbaingā. Tömënäni iñömō waa pönī pæwæ yæpængoncoo tömengā nānō wæi ñæmæncōo bai inte wæyönānite adowænē yæpæntoga godō mine timonte bai cædinque tömengā tömënäni inānite, Nāwā idægomini inte minitō wæætē miimi ongoncæminimpa, ante do cæcæcäimpa.

**Idægoidi iñque bayonte  
quëwencædänimpa, ante**

<sup>25</sup> Inānāni ëñeedāni. Minitō nāmā ængö cædāmai incæminimpa, ante

cædinque botō wëñëñedē mini ëñënāmai ingainō ante edæ wææ ämopa. Minitō idægomini ināmai imini mini pönencabo eyepæ pönī mini yebænganca idægoidi iñömō ñowo mimō ömædënāni inte wædönāni inte edæ mäninganca cöwē mimō ömædënāni inte wæcædänimpa. <sup>26</sup> Inçayæ ate guiquënë idægoidi tömәнäni quëwenguināni inānipa. Edæ iimai ante yewæmonte ongompa.

“Mönō ñā cæyænte bai tee mönete bai wæwëñömōnte nē Ñimpo Cæcā iñömō Tiño iñömō quëwente poncæcäimpa.

Aacobo wodi pæināni Wængongui ingante ëñënāmai cæte quëwënāni adinque nē Ñimpo Cæcā iñömō tömënäni nāni ëñënāmai entawënō wadæ cæcā ate tömënäni wæætē ëñente cæte quëwencædänimpa.

<sup>27</sup> Inique wënæ wënæ nāni cægainō ante wadæ cæte wido cædinque Wængongui tömënäni inānite iimai angampa.

Botō pönō cæbo ate minitō Ao ämiini inique edæ mönō godongämæ waa cæte quëwengæimpa, ante Wængongui angampa,” ante yewæmongadänimpa.

<sup>28</sup> Codito ingantedō ante watapæ ëñente pönëninque minitō idægomini ināmai imini do quëwëmini beyæ idægoidi wæætē Wængongui ingante piinte adänipa. Incæte tömënäni mæmæidi inānite nē apænte angaingā inte Wængongui wæætē mæmæidi beyænque ante pönëninque ñowodāni inānite waadete pönengampa. <sup>29</sup> Edæ waomō imonte quincoomē pönongā æñömōnte Wængongui adodō ö ænāmai ingampa. Ayæ adobai waomō imonte aa pedinque tömengā wadō ante änāmai inte edæ adodō ante edæ cöwē aa pecampa. <sup>30</sup> Minitō wëñëñedē ëñënāmai cæmiini incæte Wængongui iñömō idægoidi ëñënāmai cædāni beyæ minitō iminite wæætē waadete cædinque pönō ata cæpocā quëwëminipa. <sup>31</sup> Ayæ adobai minitō iminite pönō waadete

ata cæpocā quēwēmīni beyæ idægoidi ēñēnāmaī cædāni īñōnānite Wængongui ñōwo tōmēnāni inānite adobaī waadete cædinque godō ata cæpocā quēwēnānīmpa. <sup>32</sup>Īnīnque tōmengā, Mīni waocabo tōmāmīni īmīnite botō waadete cædinque pōnō ata cæpocæboīmpa, ante cædinque, Mīni ēñēnāmaī cæcabo īnōmīni inte mīnitō nāmā ēō toyænte aamō cædāmāī incæmīnīmpa, ante tōmāmō īmonte ñā cæyænte baī cæcā wæcōngamōīmpa.

<sup>33</sup>Īnīnque Wængongui nangui pōni waadete entawēnongā īñongante tōmengā nānō pōnō cædōnō ante mōnō ædō cæte tee mante aquīī. Tōmengā tōmancoo do adongā inte nangui pōni ēñēnongā inte cæcā ingānō anguēnē. Tōmengā edæ, Æbānō ī, ante do againgā inte edæ, Æbānō cæquīī, ante do apænte āñongante mōnō waocabo wæætē tōmengā nānō cædō ante ædō cæte ēñenguīī. Tōmengā ædōnō ponte ædōnō gocāā, ante pōnente wædinque mōnō tōmengā ōnōwa amompa diyæ taadō aquīī. <sup>34</sup>Edæ īīmaī ante nāni yewæmongainō baī īmpa. “Mōnō Awēnē æbānō pōnengāā, ante pōnente wædinque æcānō ēñengāā. Ayæ, īīmaī cæqui īmpa, ante mōnō tōmengā ingante edæ ædō cæte odōmonte apænequīī. <sup>35</sup>Wængongui ingante æcānō do godongā inte wæætē, Bitō debe īmīpa, ante anguingāā. Īñæmpa tōmengā ingante godōmōmpa diyæ debe inguingāā,” ante Itaiya wodi nānō yewæmongainō baī īmpa. <sup>36</sup>Edæ tōmengā nānō pōnongaincooque inte edæ tōmancoo ongompa. Mōnō waocabo īñōmō tōmengā badongā beyænque tōmengā quīmō baquinque ongōmōmpa. Ayæ adobaī edæ tōmengā badongā beyænque tōmancoo tōmengā quīncooque edæ baquinque ongoncoopa. Edæ tōmengā adocanque pōni ñāō entawente edæ cōwē tæī ēmoncæcāīmpa. Mānōmaī īmpa, ante mōnō, Amēē, ante apænecæīmpa.

**Wængongui quīmō īmōmpa,  
ante cæte quēwengæīmpa**

**12** <sup>1</sup>Botō tōniñamīni ēñēedāni.  
Wængongui waadete pōnō

waa cæcā ængaīmīni inte mīnitō īīmaī cæedāni, ante botō nangui āmōpa. Wængongui qui, ante baō pædæ godōnāni waa ængā baī mīnitō adobaī edæ, Wængongui quīmōni īmōnīpa, ante mīīmīni inte edæ tōmengā ingante nāmā pædæ godōmīni ængæedāni. Mānōmaī cædinque mīnitō tōmengā ōnōwa īnō mīni ædæ wæænte nangui cæquēnēnō ante edæ do cæmīni incæmīnīmpa. Mānōmaī godōmīni ænīnque tōmengā wæætē edæ, Botō ayōmo tæiyæ wæmō pōnōmīni āmōpa, ante tocæcāīmpa. <sup>2</sup>Inguipogaque ante pōnente mīni cægāinō ante ñōwo ñīmpo cædinque mīnitō mīīmīni mīni quēwengūnque ante edæ ocāi mīinque encate baī nōingā ante pōnēedāni. Mānōmaī cædinque mīnitō, Wængongui waa pōni nānō ānōnō ante, Æbānō ī, ante ædæmō ēñēnīnque, Tōmengā nānō ānō īñōmō eyepæ pōni īmpa, ante ēñencæmīnīmpa. Mānīnō ante ēñente cæte quēwēmō inte mōnō tōmengā tōnō godongāmæ waa tocæīmpa.

<sup>3</sup>Wængongui waadete pōnō cæcā ate botō nē apænebo badīmo inte īīmaī ante apænebopa. Mīnitō nāmā pōnēnīnque, Ñænæmo īmōpa, ante pōnēnāmāī īedāni. Wængongui pōnō badongā ate mīnitō wede pōnēmīni badīmīni inte mīni wede pōnenganca māningancaque pōnēnīnque īīmainō ante pōnēedāni. Botō ōnōmoque baī īnōmo īmōpa, ante ocāi encāmīni inte tōō pōni pōnēedāni. <sup>4</sup>Mōnō baō adoyonque pōni ēñāmō incæte wīī adononque mōnō cæquēnēnō ante ēñāmōmpa. Īnīnque mōnō aquīnō ante awīnca ēmōnīnque mōnō dao dao goquīnō ante ōnōwa ēwamōmpa. Ayæ wadō mōnō cæquīnō ante wayō ēñadinque mōnō wæætē wadō mōnō cæquīnō ante wayō ēñadinque wayō wayō mōnō ēñācōō ēñāmōmpa. <sup>5</sup>Īnīnque wayō wayō ēñāmō incæ mōnō baō pæ pagænguīncoo adoyonque ī baī mōnō adobaī Codīto nempo mōnō quēwencabo nangui pōni īmō incæte adocabomō īñōmō īmōmpa.

<sup>6</sup>Īnīnque mōnō adocabomō īñōmonte Wængongui waadete pōnō

cædinque mönō imonte wadō wadō mönō cæquīnō ante tōmānō pōnongā æmompā. Īninque mönō tōmengā da pōnongā mönō ænganca edæ adonganca wadō wadō cæmompā. Mānōmaī ænte cædōmō ĩñōmonte pancamīniya ĩminite Wængonguī pōnō apænecā ēñēninque mīnitō tōmengā beyæ nē apānemīni do badinque wede mīni pōnenganca apāneedāni. <sup>7</sup>Wæætē wamīni ĩminite Wængonguī pōnō cæcā æninque mīnitō wadāni ĩnānite nē cæmīni do badinque wadāni beyæ cæcæmīnimpa. Wæætē wamīni ĩminite tōmengā pōnō cædinque odōmonte apānecā ēñēninque mīnitō nē odōmonte apānemīni do badinque odōmonte apānecæmīnimpa. <sup>8</sup>Ayæ wæætē wamīni ĩminite Wængonguī pōnō waadete apānecā ēñēninque nē waadete apānemīni badinque mīnitō ĩñōmō wæntæye inte wædāni ĩnānite ædæmō apānemīni ēñēninque tōmēnāni wæætē edæ wampo pōnēninque tæi pīñænte cæcædānimpa. Wamīni ĩminite Wængonguī pōnongā æninque nē nēnempomīni badinque mīnitō, Tōmēmōni quī, ante wædāmaī inte wæætē wadāni nāni ænguēnēnō ante eyepæ godōmīni æncædānimpa. Wamīni ĩminite Wængonguī pōnō angā ēñēninque mīnitō wæætē awēnēidi baī nē āmīni badinque wadāni ĩnānite nōingā cæte awēnēidi baī ancæmīnimpa. Wamīni ĩminite Wængonguī ædæmō waadete pōnō waa cæcā æninque mīnitō wæætē ædæmō waadete cæmīni do badinque wadāni ĩnānite ædæmō waadete godō waa cædinque edæ wædāmaī inte tocæmīnimpa.

**Codito nempo quēwēninque  
īimaī cæcæimpa, ante**

<sup>9</sup>Botō waadete pōnēmopa, ante tedemīni ĩninque mīnitō nōīnō cæte waadete pōnencæmīnimpa. Wiwa mīni cædōnō ante pīīninque wido cæedāni. Wæætē, Quīnō waa cæquīī, ante adinque mānīnō ante ænte mīnitō mīmōnē ædæmō entawēninque cōwē waa cæte quēwēedāni. <sup>10</sup>Mōnō waadete

pōnencabo ĩmompā, ante pōnēninque wacā ingā wacā ingā waadete pōnente cæedāni. Wadāni nānānāni ĩnānīpa, ante mīnitō tōmēnāni ĩnānite ængō cæte baī cædinque wæætē, Botō wædāmo ĩmopa, ante nāmā ængō cædāmaī ĩedāni.

<sup>11</sup>Tæi pīñænte ēwocadinque mönō Awēnē beyæ ante wæntædāmaī inte cæedāni.

<sup>12</sup>Watapæ bacæimpa, ante pōnēninque tocæmīnimpa. Caate wæwēmīni incæte wæntæye badāmaī inte ee cæedāni. Nīmpo cædāmaī inte Wængonguī ingante cōwē apāneedāni.

<sup>13</sup>Wængonguī quīnāni ænguēnēnāni inte wædāni adinque mīnitō māincoo wæætē nēnempomīni æncædānimpa. Ayæ, Botō oncōnē pō guīite cæte mōedāni, ante wadāni ĩnānite waadete cæedāni.

<sup>14</sup>Mīnitō ĩminite nē pīinte cædāni ĩñōnānite mīnitō tōmēnāni ĩnānite waadete godō apāneedāni. Edæ tōmēnāni ĩnānite waadete apānedinque, Wængonguī mīnitō ĩminite waa cæcæcāimpa, ante apānedinque wæætē pīinte ānāmaī ĩedāni.

<sup>15</sup>Nē watapæ todāni tōnō godongāmæ watapæ toedāni. Nē Ca wædāni tōnō mīnitō godongāmæ Ca ca wæedāni.

<sup>16</sup>Mōnō pōnencabo ĩmompā, ante adoyōmō pōnente quēwēedāni. Ōnōnānique nāni nē ānōnāni tōnō godongāmæ cædinque, Botō nānānāmo ĩmopa, ante pōnēnāmaī ĩedāni. Mīnitō, Wadāni pōnōmenque ocāi encayōnāni botō godōmenque nanguī pōnī encabo ĩmopa, ante nāmā ante pōnēnāmaī ĩedāni.

<sup>17</sup>Wadāni mīnitō ĩminite pōnō wēnæ wēnæ cædāni adinque mīnitō wæætē godō wēnæ wēnæ cædāmaī ĩedāni. Ayæ, Quīnō waa cæquīī, ante tōmānāni nāni waa adōnō ante adinque mīnitō mānīnonque ante cæedāni. <sup>18</sup>Eyepæ ĩmīni inte mīnitō cæganca cædinque tōmānāni tōnō godongāmæ piyānē cæte quēwēedāni. <sup>19</sup>Botō nē waademīni ēñēedāni. Mōnō Awēnē beyæ īimaī ante yewæmongatimpa. “Wēnæ wēnæ cædāni

adique botö wënä wënä nāni cædinö beyä ante nē apænte panguënēmo inte tömēmo eyepä wæætē godö cæbo wæcædänimpa, ante Awënē angampa,” ante yewæmonte ongompæ cæmīni. Mīnitö imīnite pönö wënä wënä cædāni wæmīni ininque edæ wæætē godö cædāmaī ee aedāni. Edæ nē äingā bate pānongā inte Wængonguī incæ pancæcäimpa. <sup>20</sup>Wæætē, “Bitö imite nē piīnte cædongā incæ gæwænte wæcä adinque godömi cængæ. Gue ænente wæcä adinque godömi becæ. Edæ mänömaī waa cædinque edæ tömengā guingo imonte nānō wæwenguinque bitö tömengā ingante waa cæcæbiimpa,” ante Wængonguī beyä yewæmonte ongö apa cæbii. <sup>21</sup>Tömēnāni wënä wënä nāni cædö beyä oda cædāmaī inte wæætē mäninö ante wido cæte baī cædinque bitö waa cædinque edæ tæi emonte gānā cæe.

**13** <sup>1</sup>Gobiedöno awënē nempo waodāni ēñente cæte quëwencædänimpa, ante Wængonguī incæ godö gö cæcä beyænque gobiedöno awënēidi badänipa. Edæ Wængonguī mänömaī ante gö cædāmaī ingā baī quingānō awënē inguënengä. Edæ dæ ancædönimpa. Ininque gobiedöno awënēidi inānite mönō tömāmō Ao äinque ēñente cæcäimpa. <sup>2</sup>Ininque awënē ingante æcänö Baa ānaa tömengā nānō apænte pante wæquinque Wængonguī nānō goncægāinö ante ēñēnāmaī inte edæ Baa angampa. <sup>3</sup>Nē waa cædāni guiquënë awënēidi inānite waa ate todinque guīñēnāmaī inānipa. Wæætē wënä wënä cædāni guiquënë awënēidi inānite guīñente wædänipa. Gobiedöno awënē ingante guīñēnāmaī inte quëwencæboimpa, ante bitö ämitawoo. Ininque bitö guīñēnāmaī inte quëwencæte ante waa cæcæbiimpa. Waa cæbi adinque tömengā, Bitö waa cæbi abopa, ante pönö waa cæcä ininque bitö guīñēnāmaī imāimipa.

<sup>4</sup>Botö imote nē cædongā inte mīnitö beyä waa cæcæcäimpa, ante Wængonguī gobiedöno awënē ingante

godö gö cæcä ongongampa. Edæ Wængonguī ingante nē cæcä inongā inte tömengā nē wënä wënä cæcä ingante nō cæte nē panguënengā ingampa. Ininque awënē yaēmē nē næængā inte wīi ononque næængampa cæbii. Wënä wënä cæbi ininque edæ guīñente wæcæbiimpa. <sup>5</sup>Ininque mönō, Pangā wæcæ wæ, äinque awënē ingante ēñente cæcäimpa. Ayä pangā wæmō incæ wīi pangā wæmō incæ mönō mīmō nē entawente nāmā apænte änömō inte mönō awënē ingante Ao ante ēñente edæ nöingā cæcäimpa. <sup>6</sup>Wængonguī beyä nē cædönāni inte awënēidi iñömō tömēnāni nempo quëwēnāni inānite cōwē aadinque mäninque cæte quëwēnānipa. Mänömaī i ininque mīnitö, Awënēidi eyepä äinque mönitö beyä cæcædänimpa, ante tömēnāni nāni äinta pædæ godömini ænānipa.

<sup>7</sup>Æcāmenque ingante cæquënēmīni imīni inte mīnitö tömānāni inānite mīni cæquënganca do godö cæmīni æncædänimpa. Awënē nempo quëwēñömonte tömengā eyepä äinque mönō beyä cæcæcäimpa, ante mīnitö awënē nānō äinta godonguënēmīni inte do godömini ængædāni. Waocä ingante mīnitö guīñente ēñenguënēmīni imīni ininque tömengā ingante guīñente ēñēdāni. Waocä ingante mīnitö waa aquënēmīni imīni ininque edæ tömengā ingante waa aedāni.

<sup>8</sup>Wacä ingante mīni cæquënēnō ante edæ ee ongönāmaī inte godö cæmīni ængā ate abæ tawænte gocæbiimpa. Wæætē wacä ingā wacä ingā waadete mīni pönenguënēnō ante edæ godongāmæ cōwē waadete pönenguënēmīni imīnipa. Wadāni inānite nē waadete pönengā iñömō tömengā iñömō Wængonguī nānō, İmaī cædāni, ante nānō wææ angāinö ante do ēñente cæcä ingampa. <sup>9</sup>Tömēmi nāmā bitö waadete pönēnō ganca wacä ingante adoganca waadete pönencæbiimpa, ante Möitee wodi yewæmongacäimpa. Mānine adodeque ante ēñente cædinque waocä

Wængonguī nānō wææ angainō ante tōmānō do iinque cæcampa. Edæ, “Bitō nānōogængā ināmaī iŋongante godō guēa mōnāmaī iē. Wacā ingante godō wænōnāmaī iē. Wacā nānō ēadincoo adinque godō ænāmaī iē. Wacā wænæ wænæ cæcā atabopa, ante godō babæ wapiticæ apænedāmaī iē. Wacā qui ante æinente wædāmaī iē.” Māninecoo Wængonguī nānō wææ angainecoo ante bitō waadete pōnēmi beyænque tōmāne do iinque cætimpā. Ayæ quīnemē godōmenque wææ ante ī mānīne adobaī bitō waadete pōnēmi beyænque tōmāne do iinque cætimpā. <sup>10</sup>Nē waadete pōnengā iŋōmō edæ wacā ingante cōwē wīwa cædāmaī ingampa. Mānōmaī beyæ nē ædæmō waadete pōnēnānique Wængonguī nānō wææ angainō ante iinque cædānīpa.

<sup>11</sup>Iinque, Nōwoyedē æbānō oo baquīi, ante do ēñēnīnque mīnitō waadete pōnente quēwēedāni. Edæ wēēñēdē mā mōnō wede pōnēdē mīnguipo mōnō quēwēngūimāmo iŋōmō edæ mānīdēdē edæ oo bacæ cædāmaī ingatimpā. Nōwo guiquēnē, Oo pōni bacæimpā, ante pōnente wædinque mīnitō mōwocodē oŋōmīni inte edæ nāni ōmæmōnīnque mīimīni quēwēedāni.

<sup>12</sup>Wēmō iŋōmō mōnō wæwēmāmo idæwaa edæ bapa. Mīnguipoga nāō baī baquinque edæ oque pōnente impā cæmōō. Wēmō iŋonte mōnō wænæ wænæ cædō æmæwo wido cædinque, mōnō wæætē nāō iŋōmō quēwēnīnque edæ wææ cæquincoo wēñate baī cædinque nāmā wææ gompotawengæimpā.

<sup>13</sup>Mānōmaī cædinque mōnō itædē quēwēnōmō inte nō pōni cæcæimpā. Baonque ante mōnō cæinēwēnō ante towēnāmaī inte mōnō tī nāmæ nanguī bete quidi quidi dowænāmaī ingæimpā. Mōnō wacā tōnō godō guēa mōnāmaī, cænguī eyepæ cænīnque godōmenque nanguī cænāmaī ingæimpā. Wæætēdō wæætē piinte cædāmaī inte mōnō, Wacā baī bacæboimpā, ante piinte adāmaī ingæimpā. <sup>14</sup>Wæætē wææ cæquincoo entawente baī cædinque mīnitō nāmā

wææ gompotawencæte ante cædinque mōnō Awēnē Itota Codito ingante entawente quēwēedāni. Ayæ baonque ante mīni cæinēwēnō ante wido cædinque, Æbānō cæte wænæ wænæ cæquīmoo, ante cæcæte ante wædāmaī iedāni.

**Mīnitō tōnīnadāni inānīte piinte anāmaī iedāni, ante**

**14** <sup>1</sup>Wacā wīi ædæmō pōnengā incæte mīnitō, Mōnō pōnencabo iŋompa, ante pōnēnīnque tōmengā adocabocā nānō baquinque amīni pongædāni. Tōmengā nānō pōnēnō ante wæætēdō wæætē anāmaī iedāni. <sup>2</sup>Pancadāniya wede pōnēnāni inte cænguī adinque, Nāwā cænguī impā, ante guīñēnāmaī inte quīēmē cænguī incæ edæ dobæ ade cænānīpa. Wadāni guiquēnē æmæ pōnente beyæ, Tōmāā baō baacā impā, ante awente baī cædinque quingāmenque baō incæ cænāmaī inte onguīpoīya pæcooque edæ cænānīpa. <sup>3</sup>Incæte tōmāā cænguī nē cænongā iŋōmō onguīpoīya pæcooque nē cænongā ingante piinte adāmaī incæcæimpā. Wacā ingante, Bitō ōnōmīque baī iŋōmi inte edæ awente cænāmaī iŋmīpa, ante anāmaī incæcæimpā. Ayæ wæætē onguīpoīya pæcooque nē cænongā guiquēnē baō nē cænongā ingante, Baacā apa cæwēe, ante apænte ante piināmaī incæcæimpā. Edæ nē cænongā ingante Wængonguī Ao anīnque, Botō quīmi iŋmīpa, ante do ængampa. <sup>4</sup>Iŋæmpā tōmengā wacā awēnē ingante nē cæcā iŋongante bitō ædō cæte apænte amīi. Edæ tōmengā awēnē incæ, Waa cæbīpa, angā wædinque edæ tōmengā adiyæ tæi ongōmaingampa. Wæætē adocā tōmengā awēnē, Wænæ wænæ cæbīpa, angā wædinque edæ tæ go wææmaingampa. Incæte edæ tōmengā mōnō Awēnē ingante nē cæcā iŋongante mōnō Awēnē adocā incæ tæi piñænongā inte eyepæ cædinque edæ æænō gō cæcā tæi ongoncæcæimpā.

<sup>5</sup>Ayæ wacā guiquēnē, Pancaōnaa godōmenque waa ēōnæpa, ante

cæcæimpa, ante pönēñongante wacā  
 guiquēnē, Tömää itæðē ðnönæque  
 impa, ante pönengampa. Ìninqe monö  
 pönencabo wacā wadö wacā wadö  
 pönēmö incæte monö tömämö iñömö  
 edæ, Nämä botö pönēnonque ante botö  
 nö pönente cæcæboimpa, ante edæ  
 mäninonque ante cæcæcäimpa. <sup>6</sup>Edæ,  
 Pancaönaa godömenque waa ëönæpa,  
 ante nē pönengä guiquēnē tömengä  
 monö Awēnē ingante waa adinque  
 mänömainö ante cæcampa. Pancaönaa  
 wīi godömenque waa ëönæpa, ante nē  
 pönengä guiquēnē tömengä adobaī monö  
 Awēnē ingante waa adinque mänömainö  
 ante cæcampa. Baö nē cænongä guiquēnē  
 Wængonguī ingante, Waa pönömi  
 cæmopa, ante adobaī monö Awēnē  
 ingante waa adinque cængampa. Baö  
 ate nē awente cænāmaī ñongä guiquēnē  
 tömengä adobaī Wængonguī ingante,  
 Waa pönömi cæmopa, ante onguipoiya  
 pæcooque cæninque monö Awēnē ingante  
 waa adinque baö cænāmaī ingampa.

<sup>7</sup>Mönö pönencabo iñömonte  
 æcämenque incæ nämä beyænque dicæ  
 quëwengää. Dicæ nämä beyænque  
 wængää. <sup>8</sup>Wæætē edæ quëwëmö ininque  
 mönö Awēnē beyænque quëwëmopa.  
 Wæætē edæ wæmö ininque mönö  
 Awēnē beyænque wëmopa. Ìninqe  
 quëwëmö incæ wæmö incæ mönö  
 Awēnē quimö inömö inte quëwëninque  
 tömengä quimö inte edæ wëmopa.  
<sup>9</sup>Edæ do wængainäni beyæ ante mīimö  
 quëwëmö beyæ ante Codito tömämö  
 Awēnē nänö baquinque edæ wænte ñäni  
 ömæmongacäimpa.

<sup>10</sup>Bitö guiquēnē bitö tönīñacä  
 ingante æðö cæte apænte ämii. Ayæ  
 bitö tönīñacä ingante, Önömique  
 baī ñimipa, ante quinante ämii. Edæ  
 Wængonguī nänö apænte anguimpaa  
 gäänē ongöñömonte tömengä tömämö  
 ñimonte apænte ancæcäimpa cæbii.

<sup>11</sup>Edæ Wængonguī beyæ ante iīmaī ante  
 yewæmonte ongompa.

“Mönö Awēnē incæ, ‘Nē Quëwëmö  
 inömö inte edæ ämo ëñēðäni,’  
 angampa.

Ayæ, ‘Mīnitö tömämīni botö önöwa  
 inö da guicapodinque,  
 Bitö Wængonguī inömi  
 ñimipa, ante adoyömö  
 apænegæmīnimpa,’ angampa.”

<sup>12</sup>Ante nāni yewæmongainö baī ñinque  
 cædinque mönö tömämö Wængonguī  
 weca ponte ongöñinque mönö  
 pönengainö ante mönö apænegainö ante  
 mönö cægainö ante tömengä ingante  
 edonque pönī apænegæcäimpa.

**Wacä oda cæcæcäimpa, ante  
 cæðämaī incæbiimpa, ante**

<sup>13</sup>Mänömaī beyæ mönö wacä ingante  
 apænte änāmaī ingæimpa. Wæætē  
 mīnitö, Waa cæcæboimpa, ante nämä  
 wææ cædinque, Botö tönīñacä taadö  
 nänö goquinö ante ee acæboimpa, ante  
 pönēðäni. Tömengä tee tëwate baī  
 oda cæðämaī incæcäimpa, ante nöingä  
 cæquinque ante pönencæmīnimpa.

<sup>14</sup>Botö iñömö Itota Codito nempo  
 quëwëmö inte edæ nöingä pönëninque,  
 Tömää cænguī nämä incæ näwäaquiringä  
 impa, ante do ëñëmopa. Incæte wacä,  
 Pancaa cænguī baacä impa, ante nē  
 pönengä inte tömengä beyæ baacä  
 iñönte tömengä nänö, Baacä impa, äno  
 cænāmaī inguënegä ingampa.

<sup>15</sup>Bitö quingämē cæmi adinque  
 bitö tönīñacä, Baacä apa cæwëe, ante  
 wæwente bacä ñinque bitö waadedämaī  
 inte godömenque cæmaimipa. Edæ bitö  
 tönīñacä beyæ Codito wængacäi apa  
 quëwëe. Bitö tönīñacä nänö pönëñāmaī  
 bate wænguinque baö cæmipa, ante  
 wædinque bitö tömengä ingante  
 näwangä waadete pönëmi inte tömengä  
 beyænque ante cöwë baö cænāmaī  
 incæbiimpa. <sup>16</sup>Botö mänömaī cædinque  
 waa pönī cæbopa, ante pönëmi incæte  
 wadäni bitö waa cæðö ante, Wīwa  
 cæbipa, ante pönö babæ ante tedewënäni  
 ate wædinque bitö wæætē waadete  
 pönëninque wææ ämi tedewënämaī  
 incæðänimpa. <sup>17</sup>Wīi cænguinque ante  
 wīi bequinque ante Wængonguī nempo  
 quëwëmopa. Wæætē Wængonguī Tæiyæ  
 Wæmö Önöwoca nempo quëwëñömonte



tömengä pönö cæcä æninque mönö nö entawenguinque impa. Ayæ mönö gånë pönenguinque ante mönö watapæ tote quëwenguinque ante tömengä nempo quëwëmompä. <sup>18</sup>Edæ Codito nempo quëwëninque waocä mänömaï cæcä adinque Wængonguï tömengä ingante waa ate tocampa. Waodäni adobaï, Waa cæbipa, ante waa adänipa.

<sup>19</sup>Mänömaï impa, ante adinque, Mönö pönencabo godongämæ piyænë cæte quëwengäïmpa, ante, Ayæ mönö godongämæ wede pönëninque tæï mänonte bai ongongäïmpa, ante mönö nanguï cæcäïmpa. <sup>20</sup>Ïninque cænguï cæinente beyænque bitö Wængonguï nänö në badongainäni ïnänite bæ tadämaï incæbiïmpa. Tömää cænguï edæ näwäaquiringä impa. Incæte bitö cænïnö beyænque wacä ëñënamäi inte tee tëwate bai oda cæbaingampa, ante do ëñëmi inte bitö godömenque cæmi ïninque wïwa cæbaïmipa töö. <sup>21</sup>Waa cæcæte ante bitö ïïmaï cæcæbiïmpa. Bitö baö cæmi beyæ, biïnömæ nani wædænque tí nämæ bebi beyæ, quïëmë cæbi beyæ bitö tönïñacä oda cæte wæcantawo. Ïninque bitö ïñömö, Botö tönïñacä oda cædämaï incæcäïmpa, ante wææ cædinque ee cædämaï ïmi ïninque waa ïmaïmpa.

<sup>22</sup>Mänïnö, Æbänö cæte waa inguïï, ante bitö pönënö beyænque wadäni ïnänite apænte änämaï inte bitö adobique inte Wængonguï ayongante cæcæbiïmpa. Waa cæquï impa, ante mïmöno bitö pönënonque ante mänïnonque cædinque bitö tente wæquinque cædämaï inte waa tobaïmipa. <sup>23</sup>Wæætë në æmæ pönengä guiquënë, Cæmo beyæ Wængonguï pangä wæcæ wæ, ante wædingä inte tömengä nämä nänö apænte pante wæquinque ade cængampa. Edæ æcänö wede pönënamäi inte cæda tömengä nänö cædönö tömänö edæ wïwa cætïmpa. Ïninque bitö cædö tömänö wede pönente cæcæbiïmpa.

Wadäni incæ watapæ  
quëwencædänïmpa, ante cæe, ante

15

<sup>1</sup>Mönö në wede pönëmö ïñömö tæï piñænte entawëmö ïnömö

inte nämanque ante mönö cæinënö ante edæ wædämaï ingäïmpa. Wæætë edæ në æmæ pönënanï guiquënë tömënanï aquïï pönï ïnänï inte, Ædö cæte cæquïmoo, ante wædäni adinque mönö tömënanï wædö ante ænte mongænte bai cædinque tömënanï tönö ïñacabo cæcäïmpa. <sup>2</sup>Godongämæ godö cæmö æninque waa todinque tömënanï wæætë wede pönëninque oncö tæï mänonte bai tæï ongoncædänïmpa, ante mönö ædæmö cæcäïmpa. <sup>3</sup>Edæ mönö Codito incæ nämanque ante nänö cæinënö ante cæcæte ante edæ wædämaï inte piyænë cægacäïmpa. Wængonguï ingante do nani apænegainö bai tömengä wadäni beyænque ante cægacäïmpa. “Wængonguï ëñëmi. Wadäni bitö ïmite pïinte badete tocæte ante cædinque botö ïmote wæætë pïinte badete todänipa,” ante apænete bai Codito ee cægacäïmpa. <sup>4</sup>Edæ mönö ïmonte odömönte apænecæte ante Wængonguï angä ëñëninque dodäni tömantaa yewæmongadänïmpa. Ïninque mäninta ædæmö adinque wampo pönëninque wæntædämaï inte ee cæmö ïninque edæ mönö, Watapæ bacæïmpa, ante pönente tocæïmpa.

<sup>5</sup>Ïninque Codito Itota mïñæ tee empote goyömönte Wængonguï ïñömö edæ, Mïnitö wampo pönëninque wæntædämaï inte ee cæcæminïmpa, ante në ædæmö cæcä ingampa. Tömengä mänömaï pönö cæcä ate mïnitö ïñömö adoyömö ante mïni pönencabo bacæminïmpa, ämopa. <sup>6</sup>Mänömaï bamïni ïninque mïnitö änanque bai adodö ante pönëninque ïïmaï ante Wængonguï ingante apænecæminïmpa. Mönitö Awënë Itota Codito Mæmpobi ïnömi inte bitö tömengä Wængonguï adobi ïmi ïñömö bitö tæï ëmömi inte nãö apäite bai ïmi amönipa, ante adoyömö ante apænecæminïmpa, ante botö mänömainö ante yewæmömopa.

Oodeoidi ïnämaï ïnänï  
ëñencædänïmpa, ante

<sup>7</sup>Codito mïnitö ïmïnite Ao ante ængacäïmpa. Ïninque tömengä

mīnitō imīnite nānō ængāi bai  
 mīnitō adobai wacā ingā wacā ingā  
 godongāmæ Ao ante æedāni. Mānōmai  
 cæmīni adinque wadāni Wængonguī  
 ingante apænedinque, Bitō waa pōnī  
 cæbi amōnīpa, ante watapæ pōnī  
 apænecædānīmpa. <sup>8</sup>Edæ apænebo  
 ēñēedāni. Mōnitō mæmæidi inānite  
 Wængonguī, Mīnitō beyæ pōnō waa  
 cæcæboīmpa, angacāīmpa. Īnīnque,  
 Wængonguī tōmengā nānō angainō  
 ante cōwē cæcæcāīmpa, ante oodeoidi  
 ēñencædānīmpa, ante cædinque  
 mōnō Codito tōmēnāni beyæ nē  
 cæcā bagacāīmpa. <sup>9</sup>Tōmengā iñōmō,  
 Idægoidi ināmai ināni incæ Wængonguī  
 ingante, Bitō nāō bai ēmōmi inte pōnō  
 waadete waa cæbi æmōnīpa, ante  
 apænecædānīmpa, ante mānōmai  
 cægacāīmpa. Īmai ante Wængonguī  
 beyæ nāni yewæmongainō bai impa.

“Botō mānōmai beyæ, Bitō æbānō nē  
 waa cæbi imīi, ante idægo ināmai  
 ināni weca gote apænecæboīmpa.

Bitō ēmōwo ante āmotamīni  
 watapæ pōnī ancæboīmpa,” ante  
 nāni yewæmongainō bai Codito  
 cægacāīmpa.

<sup>10</sup>Ayæ wataa iñōmō iīmai ante  
 yewæmongatīmpa.

“Idægoidi ināmai imīni incæ  
 mīnitō Wængonguī quīnāni tōnō  
 godongāmæ watapæ toedāni.”

<sup>11</sup>Ayæ wæætē,

“Idægoidi ināmai imīni mōnō Awēnē  
 ingante apænedinque, Bitō waa  
 pōnī cæbi amōnīpa, ante watapæ  
 pōnī apæneedāni.

Wamīni mīni cabo mīni cabo  
 tōmāmīni āmotamīni ante bai  
 apænedinque, Waa pōnī cæbi  
 amōnīpa, ante watapæ pōnī  
 apæneedāni.”

<sup>12</sup>Itaiya wodi adobainō ante  
 yewæmongacāīmpa.

“Inguipoga quēwēnāni tōmānāni  
 Awēnē baquinque  
 Awænguinto tā bocate bai cædinque  
 Yæte Pæingā iñōmō ængæ  
 ganticæcāīmpa.

Tōmengā cæcā beyænque  
 watapæ bacæīmpa, ante  
 idægoidi ināmai ināni incæ  
 pōnencædānīmpa,” ante Itaiya  
 wodi yewæmongacāīmpa.

<sup>13</sup>Wængonguī iñōmō, Watapæ  
 bacæīmpa, ante nē badongaingā  
 inongā inte iīmai cæcæcāīmpa, āmopa.  
 Tōmengā Tæiyæ Waēmō Ōnōwoca  
 tæi piñænte cæcā ate mīnitō, Watapæ  
 bacæīmpa, ante godōmenque wede  
 pōnencæmīnīmpa. Mānōmai cæcate  
 ante cædinque Wængonguī pōnō  
 apænecā ēñēnīnque mīnitō tōmengā  
 ingante wede pōnēnīnque edæ gānē  
 entawēnīnque watapæ tocæmīnīmpa,  
 āmopa.

<sup>14</sup>Botō tōnīnāmīni ēñēedāni. Botō  
 tōmēmo ayōmote mīnitō nē waa cæmīni  
 imīni abopa. Ayæ, Æbānō waa cæquīi,  
 ante do ēñēmīni imīnīpa. Ayæ adobai  
 mīnitō eyepæ imīni inte wacā ingā  
 wacā ingā do odōmōte apænēmīni  
 imīnīpa, ante pōnēmopa. <sup>15</sup>Īnīnque  
 botō, Mīnitō ēñēnīnō ante mīnitō  
 ocai encadōmīni inte edæ adodō ante  
 pōnencæmīnīmpa, ante bai cædinque  
 pancadea ante yewæmontabopa. Botō  
 iñōmō Wængonguī waadete pōnō cæcā  
 ænte nē entawēmo inte mānōmainō  
 ante yewæmōnīnque edæ guīñēnāmai  
 inte nanguī ante yewæmōmopa.

<sup>16</sup>Edæ tōmengā waadete pōnō cæcā  
 ænte entawēnīnque botō Itota Codito  
 beyænque ante idægoidi ināmai ināni  
 inānite nē cæbo badinque Wængonguī  
 ingantedō ante watapæ apænebo  
 ēñēnānīpa. Mānōmainō ante apænebo  
 ēñēñōmīnīte Wængonguī Tæiyæ Waēmō  
 Ōnōwoca pōnō badongā ate idægoidi  
 ināmai ināni incæ tæiyæ waēmō  
 ēwocate quēwēnāni badānīpa. Mānōmai  
 bayōnānīte botō iñōmō, Wængonguī  
 quī, ante pædæ godōnāni bai cædinque  
 tōmēnāni inānite ante edæ, Wængonguī  
 quīmīni bacæmīnīmpa, ante pædæ  
 godōmo ænīnque Wængonguī wæætē  
 waa tocampa.

<sup>17</sup>Mānōmai beyæ botō Itota Codito  
 nempo quēwēnīnque Wængonguī beyæ

cædinqe edæ nanguï tobopa. <sup>18</sup>Codito botö tönö guëa cæcä beyænque botö nanguï apænedinqe nanguï cæbo ate tömengä iñömö töö æmængä pöninge edæ idægoidi inämaï inäni incæ edæ Wængonguï ingante ëñente cædäni badänitapa. Botö Codito mänömaï botö tönö nänö cædinö ante apænedinqe edæ mäninqe ante apænedinqe guïñënete wædinqe godömenque apænedämaï incæboimpa. <sup>19</sup>Wængonguï Tæiyæ Waëmö Önöwoca tæï piñænongä inte botö tönö godongämæ cæcä ate botö, Ëñencædänimpa, ante bamöngengæ cæbo ate nê pönënanäni badänitapa. Mänömaï Eedotadëë iñömö mä cæte godinqe Ididiabæ ganca tömäo godämæ godinqe botö Codito ingantedö ante watapæ apænedinqe adodö adodö ante tömänö ante apænebo ëñënanitapa.

<sup>20</sup>Botö, Codito ëmöwo ante wädäni nänäni apænedämaï iñömö gote tömengä ingantedö ante watapæ apænebo ëñencædänimpa, ante cöwë goïnente wætäbopa. Wacä onguitanca nänö tæñöncönë æmonga mænönämaï incæboimpa, ante bai cædinqe botö, Wacä do nänö apænediñömö botö wæætë apænedämaï incæboimpa, ante cætäbopa. <sup>21</sup>Wæætë iïmaï ante Itaiya wodï nänö yewæmongainö bai cætäbopa.

“Tömengä ingante ante ëñënamäi iñinäni incæ edæ do ate bai ewocæcædänimpa.

Önömonca ëñënamäi iñinäni incæ edæ, ‘Æbänö i,’ ante do ëñencædänimpa.”

Ante nänö yewæmongainö bai botö, Ëñencædänimpa, ante cætäbopa.

#### **Odömä iñömö pöinëmopa, Pabodo angampa**

<sup>22</sup>Mänömaï beyæ botö mïnitö weca poncæ cæyömote edæ, Wææ cæte i, ate wædinqe pönämaï intäbopa. <sup>23</sup>Iñömö ömæ idæwaa cæbo inte botö æpomë wædepo iñonte mïnitö imïnite aïnente wædömopa. <sup>24</sup>Iñinqe botö, Iñcayæ ate Epäñabæ gocæ cædinqe wodo tebæ godinqe mïnitö weca ëñate

aboque gocæboimpa, ämopa. Edæ botö wantæpiyæ ëñate tote quëwente ate godömenque Epäñabæ gote cæyömo mïnitö botö beyæ cædinqe da godömiñi gocæboimpa.

<sup>25</sup>Nöwo guiquënë botö täno Eedotadëë iñömö Wængonguï quïnäni beyæ godö cæcæte ante gobopa. <sup>26</sup>Wængonguï quïnäni incæ Eedotadëë quëwënanäni pancadäniya ömæpodäni inte wædänipa, ante pönente wædinqe wabæca Mäatedöniabæ quëwënanäni tönö Acayabæ quëwënanäni tönö, Mönö da godö da godö cæcæimpa, ante pönëninge watapæ todinqe tömënanäni, Wængonguï quïnäni qui, ante do godönänitapa.

<sup>27</sup>Mänömainö ante watapæ pönente cædäni incæte tömënanäni Eedotadëë iñömö quëwënanäni inänite nê godonguëñënanäni inte da godönänimpa. Edæ Wængonguï Önöwoca nänö pönongaincoo ante idægoidi pönö apænedäni ëñente ænte ewocædinäni inte wabæca quëwënanäni iñömö tömënanäni nänäni ëadincoo incæ idægoidi beyæ ante wæætë godonguëñënanäni badinäni inänipa. <sup>28</sup>Iñinqe botö iñömö mänincoo tömënanäni nänäni da godönincoo idægoidi weca ænte gocæboimpa. Godinqe botö cöwä adinqe, Nê ömæpodäni inte nê wædänique æncædänimpa, ante wææ cæcæboimpa. Ædæmö cæbo ænänäni ate botö mäniñedë ate Epäñabæ gocæte ante cædinqe mïnitö ömæ wodo tebæ godinqe mïnitö weca ëñacæ poncæboimpa. <sup>29</sup>Codito pönö waa cædinqe da pönongä pöninge botö cöwë tömengä tönö waa pönï botö cæquinque mïnitö weca poncæboimpa, ante do ëñëmopa.

<sup>30</sup>Botö tönïñamïni ëñëedäni. Botö pæ pagænte bai nanguï cæyömote mïnitö iñacabo cædinqe botö beyæ Wængonguï ingante nanguï apæneedäni, ante botö mönö Awënë Itota Codito beyænque äninge ayæ Wængonguï Önöwoca nê waadete pönengä beyænque äninge mïnitö imïnite nanguï ämopa. <sup>31</sup>Oodeabæ pönënamäi inäni iñömö Pabodo ingante

wënæ wënæ cædāmaī incædānimpa, ante botō beyæ ante apæneedāni. Ayæ, Eedotadēē iñōmō botō gote cæbo adinque Wængonguī quīnāni incæ botō cædō ate Ao ancædānimpa, ante apæneedāni. <sup>32</sup>Mānōmaī ī adinque botō, Awënë Wængonguī angā ate botō watapæ todinque mīnitō weca pōmo ate mōnō godongāmæ guēmānīnque wampo pōnengæimpa, āmopa. <sup>33</sup>Wængonguī nē gānē pōnengā inte mīnitō tōnō godongāmæ ongōnīnque pōnō cæcā ate gānē pōnencæmīnimpa, āmopa. Mānōmaī impa diyæ, ante botō, Amēē, āmopa.

Waa quēwencæmīnimpa, ante

**16** <sup>1</sup>Botō iīmaī āmopa. Mōnō tōniñacā tōmengā ěmōwo Pebe mīnitō weca ñōwo poncæ cæcampa. Tencodea iñōmō Codito ingante nāni godongāmæ pōnencabo iñōnānīte tōmēnāni beyæ nē waa cæcā inte iingā onquiyængā iñōmō waingā pōnī ingampa. <sup>2</sup>Tōmengā nanguī iñāni beyæ wææ gompodinque waa cædongā inte botō beyæ adobaī nanguī cæcantapa. Īnīnque edæ botō mīnitō imīnīte iīmaī āmopa. Wængonguī quīmō iñōmō inte mōnō Awënë nempo quēwēñōmonte Pebe adocā inte adobaī ingampa, ante adinque mīnitō tōmengā ingante waa adinque Ao ante æedāni. Ayæ tōmengā quīēmē æīnente wæcā iñongante mīnitō wæætē edæ godō cædāni āmopa. <sup>3</sup>Ayæ wada Pīditīda tōnō Aquīdæ nāna gæncaya iñōmō Itota Codito nempo quēwēnīnque edæ botō tōnō godongāmæ cæda inapa. Īnīnque mīnitō tōmēna inate, Waa quēwencæmīnīnimpa, ante botō beyæ ante apænemīni ēñēcædaimpa. <sup>4</sup>Wadāni botō imote wænōncæ cædāni wæyōmote tōmēna nāna wodo wænguīnque edæ botō imote wææ cædatapa. Mānōmaī cædapa, ante botō tōmēna inate waa ate pōnente apænebopa. Ayæ idægoidi iñāmaī iñāni Codito ingante nāni wayōmō pōnencabo wayōmō nāni pōnencabo adobaī tōmānāni Aquīdæda nāna cædīnō

ante ēñēnīnque tōmēna inate waa ate pōnēnīnque apænedānīpa.

<sup>5</sup>Ayæ Itota Codito ingante nē pōnēnāni Aquīdæda oncōnē godongāmæ pō guīdāni iñānīte, Waa quēwēedāni, ante apænemīni ēñēncædānīpa. Botō æmīgo Epēneto botō nē waadecā iñongante mīnitō botō beyæ apænedīnque, Waa quēwencæbiimpa, ante apæneedāni. Atīabæ iñōmō Codito ingante wadāni pōnēnāmaī iñōnāni tōmengā iñōmō tāno pōnengantapa. <sup>6</sup>Ayæ Māadiya mīnitō beyæ nanguī cædingā iñongante mīnitō wæætē tōmengā ingante Waa quēwencæbiimpa, ante apæneedāni. <sup>7</sup>Botō guīdēna Antodōnīco tōnō Nōniato iñōmō botō tōnō godongāmæ tee mōnete wædīna inapa. Tōmēna iñōmō botō pōnēnāmaī iñōmote wēēñēñedē Itota Codito nempo quēwēna iñōnate Codito incæ tōmēna inate da godongacāimpa. Īnīnque, Itota Codito nānō nē da godongaīna tānoda ina adinque mīnitō botō beyæ ante tōmēna inate waa apæneedāni.

<sup>8</sup>Ayæ wacā mōnō Awënë nempo quēwēnīnque Ampīdiato ingante waadete pōnēmo inte edæ botō, Waa quēwencæbiimpa, āmopa. <sup>9</sup>Ayæ adobaī Odōmāno mōnītō tōnō godongāmæ Codito nempo quēwente nē cæcā iñongante, Waa quēwencæbiimpa, ante botō beyæ ante apæneedāni. Botō nē waadecā Etaquito ingante adobaī ante apæneedāni. <sup>10</sup>Ayæ Apede iñōmō Codito nempo quēwēñongante tōmengā æbānō cæcāā, ante adinque Codito tōmengā ingante wæætē, Waa cæbi abopa, angampa. Tōmengā ingante botō beyæ ante waa apæneedāni. Ayæ Adītobodo nāni quēwencabo iñānīte adobaī waa apæneedāni. <sup>11</sup>Botō guīdēngā Edodīyaōnō ingante waa apæneedāni. Ayæ Nāadotito guīdēnāni incæ æcānō mōnō Awënë nempo quēwēna tōmēnāni iñānīte adobaī, Waa quēwencæmīnīnimpa, æedāni.

<sup>12</sup>Ayæ wada mōnō Awënë nempo quēwēna onquiyæna Tīdīpīna tōnō Tīdīpota iñōmō nē nanguī cæda inapa.

Tömëna inate botö beyäe ante waa apäneedäni. Ayäe wacä onquiyängä mönö nê waadecä Pedetida iñömö tömengä mönö Awënë nempo quëwëningue nanguï cæcantapa. Tömengä ingante adobaï, Waa quëwencæbiimpa, äedäni. <sup>13</sup>Ayäe mönö Awënë nänö nê apäente ængaingä Odopo ingante waa apäneedäni. Tömengä badä incæ adobaï botö badä bai iñönante tömëna inate botö beyäe ante waa apäneedäni. <sup>14</sup>Ayäe adobaï Atincodito, Pedegonte, Edëme, Patodobato, Edëma tömënanäni nani pönencabo tömänäni inänite, Waa quëwencæminimpa, ante apäneedäni. <sup>15</sup>Ayäe wadäni Pidodogo tönö Oodia, Nêdeeo tömengä mængä tönö, Odimpa tönö Wængonguï quinäni tömänäni inänite, Waa quëwencæminimpa, ante apäneedäni.

<sup>16</sup>Edæ, Waa quëwencæminimpa, ante minicabo incæ tömämäni godongämæ waa waadete apäneedäni. Codito ingante wayömö nani pönencabo wayömö nani pönencabo tömänäni minitö iminite wæætë, Waa quëwencæminimpa, ante änanipa.

<sup>17</sup>Botö töninäminäni ëñeedäni. Minitö adocabomäni iñöminite wadäni æmæmoncadö æmæmonca pä cädäni inänite cöwä adinque edæ Baa äedäni. Doyedë minitö ëñëno ante ëñënamäi inäni inte tömënanäni, Minitö tee tæwate bai oda cæcæminimpa, ante cædinque wadö ante edæ odömönänipa cæminäni. Tömënanäni inänite gomö aquënë cæminäni.

<sup>18</sup>Mänömaï cädäni iñömö mönö Awënë Codito ingante cädämaï inte nämä nani cæinënönque ante cädänipa. Tömënanäni ante, Minitö iminite waa amönipa, ante waa tedete bai tededäni ëñëningue pancadäniya guiquënë, Babæ wapiticæ impa, ante cöwä adämaï inäni inte, Nö impa, ante do pönënanäni. <sup>19</sup>Minitö cöwë ëñente cæminäni iminipa, ante tömänäni do ëñënanäni. Mänömaï beyäe botö iñömö nanguï tobopa. Incæte, Quinö waa cæquïi, ante minitö ædæmö ëñencæminimpa, ante ainëmopa. Quinö wënæ wënæ cæquïi, ante edæ ædæmö

ëñënamäi inte edæ gomö acæminimpa, ante ainëmopa. <sup>20</sup>Wængonguï, Gänë pönente quëwencæminimpa, ante nê pönö cæcä iñömö edæ Tatäna ingante minitö önöwa gäänë wææntodongä ate minitö wæætë do pinä gawate bai cæcæminimpa. Nöwo iñömö mönö Awënë Codito nänö waadete pönö cædö incæ entawencæminimpa, ämopa.

<sup>21</sup>Botö tönö guëa cædongä Timoteo iñömö minitö iminite, Waa quëwencæminimpa, angampa. Ayäe botö guidënanäni Dotio tönö Yatönö adobaï Totipatedo adobaï minitö iminite, Waa quëwencæminimpa, änanipa.

<sup>22</sup>Nöwo botö Tedetiyo bo iñömö Pabodo önönëque tedecä ëñëningue iï cadota ante nê yewæmönimo inte botö adobaï, Waa quëwencæminimpa, ämopa.

<sup>23</sup>Gayo adobaï minitö iminite, Waa quëwencæminimpa, angampa. Tömengä oncönë Codito ingante nani pönencabo cöwë godongämæ ponte apäneedäni. Ayäe tömengä botö imote adobaï, Pöe, angä ëñëningue edæ botö nöwo tömengä oncönë owobopa. Ayäe iñömö quëwënanäni awënë nänö äinta æningue adocanque Edaato nani änogä iñömö tömengä, Tömënanäni beyäe æbänö cæquïi, ante nê angä iñömö tömengä tönö mönö töninäcä Coadoto adobaï, Waa quëwëedäni, änapa.

<sup>24</sup>Mönö Awënë Itota Codito minitö iminite pönö waadete cæcæcäimpa. Mänömaï impa, ante botö, Amëë, ante ämopa.

#### **Wængonguï ingante waa ate apäneedäni, ante**

<sup>25</sup>Nöwo iñömö Wængonguï ingantedö ante watapæ botö apäneedö ante ayäe Itota Codito ingantedö ante mönö apäneedö ante nê pönëmäni inte minitö tæi piñante ongoncæminimpa. Wængonguï eyepæ inte mänömaï pönö cæcæcäimpa. Tömengä mäninö ante nöwo tæcæ nänö odömönö ante wëenënedë pedæmämö iñonte cöwë wantæpiyæ wë wodonte bai cægacäimpa. <sup>26</sup>Nöwo guiquënë, Codito

æbānō cægacāi, ante inguipoga  
 tōmāmæ quēwēnāni ēñente wede  
 pōnēninque botō imote ēñente  
 cæcædānimpa, ante cædinque  
 Wængonguī cōwē nē Quēwēnongā  
 inte do odōmongā acæimpa. Tōmengā  
 angā ēñēninque tōmengā beyæ nē  
 apænegaināni wæætē edonque pōnī  
 yewæmōnāni acæimpa.

<sup>27</sup> Īninque Wængonguī nō pōnī  
 ēñēnongā inte adocanque Wængonguī  
 ingampa, ante adinque mōnō, Bitō  
 adobique ñāō bai ēmōmi inte edæ waa  
 cæbi amōnipa, ante mōnō Itota Codito  
 ēmōwo apænedinque Wængonguī  
 ingante edæ cōwē apænecæimpa.  
 Mānōmaī impa diyæ, ante botō, Amēē,  
 āmopa.